

ԳԱՆՁԱՐԱՆ  
ԱՂՈԹԻՑ

-----  
Չաղօթս իմ Տեառն տաց առաջի  
ամենայն ժողովրդեան նորա:  
-----

# Գ Ա Ն Ջ Ա Ր Ա Ն Ա Ղ Օ Թ Ի Ց



ԲԱՑԱՏՐՈՒԹԵԱՄԲ

ԱՐԱՐՈՂՈՒԹԵԱՆՑ Ս. ՊԱՏԱՐԱԳԻ

ԵՒ ՆՇԱՆԱԿՈՒԹԵԱՄԲ

ՋԳԵՍՏՈՒՑ ՊԱՏԱՐԱԳՉԻՆ

ԲՈՎԱՆԴԱԿԵԱԼ

Ի ՀՈԳԵՒՈՐ ՄԱՏԵՆԻՑ Ս. ՀԱՐՑ

Ի ՊԷՏՍ ՋԵՐՄԵՌԱՆԴԻՆ ԱՂՕԹԱՍԻՐԱՑ



Դ. ՏՊԱԳՐՈՒԹԻՒՆ



Ի ՏՊԱՐԱՆԻ

ԱՌԱՔԵԼԱԿԱՆ ԱԹՈՒՈՅ ՍՐԲՈՑ ՅԱԿՈՎԲԵԱՆՑ

ՅԵՐՈՒՍԱԴԷՄ

1951

Ի ՀԱՅՐԱՊԵՏՈՒԹԵԱՆ

Տ. Տ. ԳԷՈՐԳԱՅ Զ.

ՍՐԲԱԶՆԱԳՈՅՆ ԿԱԹՈՂԻԿՈՍԻ

ԱՄԵՆԱՅՆ ՀԱՅՈՑ




ՀՐԱՄԱՆԱԻ

Տ. ԵՂԻՇԵԱՅ

ՎԱՐԴԱՊԵՏԻ

ՊԱՏՐ. ՏԵՂԱՊԱՀ

ՍՐԲՈՅ ԵՐՈՒՍԱՂԷՄԻ



Ս. ՅԱԿՈՎԲ ՎԱՆՔ ՆԱՅՈՑ

Յ Ի Շ Ա Տ Ա Կ Ա Ր Ա Ն

Յ Ի Շ Ա Տ Ա Կ Ա Ր Ա Ն



Ահա Գառն Ասուծոյ՝ որ  
բառնայ զմեզս աշխարհի:



# Ա Ղ Օ Թ Ք Տ Է Ր Ո Ի Ն Ա Կ Ա Ն

Որպէս պատուիրէ Փրկիչն մեր.

— Ա՛յսպէս կացէք դուք յաղօթս :  
Մատթ. 2. 9 :

Հա՛յր մեր, որ յերկինս ես, սուրբ եղիցի անուն քո : Եկեսցէ Արքայութիւն քո . եղիցին կամք քո որպէս յերկինս և յերկրի : Զհաց մեր հանապազորդ տո՛ւր մեզ այսօր : Եւ թող մեզ զպարտիս մեր, որպէս և մեք թողու՛մք մերոց պարտապանաց : Եւ մի՛ տանիր զմեզ ի փորձութիւն . այլ փրկեա՛ զմեզ ի չարէ : Զի՛ քո է արքայութիւն և զօրութիւն, և փառք յաւիտեանս . Ամէն :


---

## Ա Ղ Օ Թ Ք

Ի ՄՏԱՆԵԼՆ ՅԱՆԿՈՂԻՆ

Դո՛ւ ես պաշտպան իմ, Տէր, և ի ձեռս քո յանձն առնեմ զհոգի իմ :

Առաքեա՛, Տէր, զհրեշտակ խաղաղու-  
թեան քո՝ որ եկեալ պահեսցէ զմեզ յան-  
խռովս ի տուէ և ի գիշերի:



Հալածեա՛ ի մէնջ, Տէր, նշանաւ Խաչի  
քո զընդդիմամարտ և զաներեւոյթ գա-  
զանն, և մի՛ տար յապականութիւն զքո  
ժառանգութիւնդ:

---

Ա Ղ Օ Թ Ք

Զ Ա Ր Թ Ն Ո Ի Լ Ն Ի Ք Ն Ո Յ

Կնքելով զդէմսդ նշանաւ սրբոյ խաչին:

---

Յանուն Հօր եւ Որդոյ եւ Հոգւոյն  
սրբոյ. Ամէն:

Օրհնեա՛լ է մեռեալն և յարուցեալն ի մեռելոց Քրիստոս Աստուած, որ զարթոյց զիս ի մահահանգոյն քնոյ, խաղաղութեամբ անցուցանելով զգիշերս. աղաչեմ և խնդրեմ զի զմնացեալ ժամանակս խաղաղութեամբ պահեսցէ շնորհիւ և ողորմութեամբ իւրով. Ամէն:

## Ա Ղ Օ Ք Ք

Ա Ռ Ա Ի Օ Տ Ե Ա Ն Ե Ի Ծ Ա Ք Մ Ա Ն Ա Ր Ե Ի Ո Ի

Տէր, եթէ զչրթունս իմ բանաս՝ բերան իմ երգեսցէ զօրհնութիւնս քո: Օրհնեալ համագոյ և միասնական անբաժանելի սուրբ Երրորդութիւն, Հայր և Որդի և Հոգի Սուրբ, այժմ և միշտ և յաւիտեանս յաւիտենից. Ամէն:

Ի գիշերի և ի տունջեան և յամենայն ժամու զքեզ աղաչեմք, և ի քէն խնդրեմք մարդասէր Տէր: Կուր մեզ Աստուած Փրկիչ մեր, խոնարհեսցի ունկն քո ի խնդրուածս մեր, զի մի՛ ունայն լիցին վաստակք ծառայից քոց: Այլ համարեա՛ զաշխատութիւնս մեր՝ ի գործ արդարութեան և ի

պտուղ Աստուածպաշտութեան: Ընկա՛լ,  
Տէր, զաղօթս և զերկրպագութիւնս մեր,  
և հատո՛ մեզ զողորմութիւն քո առատա-  
պէս. ծածկեա՛ զմեզ ընդ հովանեաւ ամե-  
նազօր աջոյ քո: Զօրացո՛ զմեզ, Տէր, զօ-  
րութեամբ սուրբ Հոգւոյդ: Պահեա՛ զմեզ  
որպէս բիր ական: Եւ արա՛ առ մեզ նշան  
բարի՝ ի գովեստ և ի փառաբանութիւն  
անուանդ քում սրբոյ: Զի ի քոյ փառս  
կատարի ամենայն արարածոց մշտնջենաւոր  
փառաբանութիւն ի բարձունս, Հօր և Որդ-  
ւոյ և Հոգւոյդ Սրբոյ, այժմ և միշտ և  
յաւիտեանս յաւիտենից. Ամէն:

## Ա Ղ Օ Թ Ք

### Յ Ե Ր Ր Ո Ր Դ Ժ Ա Մ Ո Ւ

Հոգի՛ Աստուծոյ, որ յայսմ ժամու  
ահագին շնչմամբ իջեր ի վերնատունն բա-  
ժանելով զհրեղէն լեզուս, է՛ջ և առ մեզ  
յերրորդ ժամուս և լից զմեզ ամենայն  
բարութեամբ քով՝ իբրև զսուրբ զԱռա-  
քեալսն, հանգչելով ի սիրտս մեր յաւի-  
տեանս յաւիտենից. Ամէն:

## Ա Ղ Օ Ք Ք

## Ի Մ Տ Ա Ն Ե Լ Յ Ե Կ Ե Ղ Ե Ց Ի Ն

Զայր արիւնահեղ և զնենգաւոր պիղծ  
առնես դու, Տէր. այլ ես ըստ բազում  
ողորմութեան քում մտից ի տուն քո՝ և եր-  
կիրպագից ի տաճար սուրբ քո երկիւղիւ քո:

Եղիցին քեզ հաճոյ բանք բերանոյ իմոյ,  
և խորհուրդք սրտի իմոյ առաջի քո յամե-  
նայն ժամ, Տէր օգնական իմ և Փրկիչ իմ:

Մի՛ թողուր զիս, Տէր Աստուած իմ,  
և մի՛ ի բացեայ առներ յինէն. հայեաց  
յօգնել ինձ, Տէր, փրկութեան իմոյ:

## Ա Ղ Օ Ք Ք

## Յ Ե Լ Ա Ն Ե Լ Ն Յ Ե Կ Ե Ղ Ե Ց Ի Ո Յ Ն

Ողորմութիւն քո, Տէր, զհետ իմ ե-  
կեսցէ զամենայն աւուրս կենաց իմոց, բը-  
նակիլ ինձ ի տան Տեառն զամենայն ա-  
ւուրս կենաց իմոց:



Սոսկալին Սերովբեից բառնայր  
ինձեամբ զփայտ խաչին մինչ  
ի սեղին Գողգոթայի:

## Ա Ղ Օ Ք Ք

### Ս Ո Ւ Ր Բ Պ Ա Տ Ա Ր Ա Ք Ի

Ըստ ծիսի եւ ըստ աւանդութեան չայաստանեայց Առաքելական Կաթողիկէ Ս. Եկեղեցւոյ՝ արարողութիւնք եւ պաշտամունք ի ժամու կատարման խորհրդոյ Սուրբ Պատարագի, հանդերձ նշանակութեամբ զգեստուց Պատարագին:

### Ք Ա Հ Ա Ն Ա Յ Ն

Նշանակէ զՏէր մեր, որ եղեւ ճշմարիտ Քահանայ յաւիտեան ըստ կարգին Մելքիսեդեկի, եւ զինքն ի ներքոյ տեսակաց չացի եւ Գինւոյ՝ չօր Աստուծոյ պատարագեաց:

### Ս Ա Ղ Ա Ի Ա Ր Տ Ն

Նշանակէ զօրութիւն յաղթութեան Տեառն մերոյ, որով ել ի պատերազմ ընդդէմ Բելիարայ, եւ արար զփրկութիւն ազգի մարդկան:

### Շ Ա Պ Ի Կ Ն

Նշանակէ զանմեղութիւն եւ զմաքրութիւն վարուց Տեառն մերոյ, եւ զմայլումն նորին երանական տեսութեամբ էութեանն Աստուծոյ:

## Բ Ա Ջ Պ Ա Ն Ն

Նշանակէ գյօժարութիւն սրտի, եւ զպատրաստութիւն Տեառն մերոյ առ ի կատարել զհաճութիւն չօրն երկնաւորի:

## Ո Ի Բ Ա Բ Ն

Նշանակէ զհնազանդութիւն Տեառն մերոյ առ ի լնուլ զկենսագործ տնօրէնութիւնն իւր՝ ըստ նախասահմանութեան չօրն երկնաւորի:

## Գ Օ Տ Ի Ն

Նշանակէ զողջախոհութիւն Տեառն մերոյ եւ զանխառնութիւն նորին ի զգայականաց ցանկութեանց:

## Շ Ո Ի Բ Ջ Ա Ռ Ն

Նշանակէ զլրումն ամենայն առաքինութեանց, որով զարդարեալ էր մարդկութիւն Տեառն մերոյ ի սկզբանէ յղացման իւրոյ:

## Մ Տ Ա Ն Ե Լ Ն Ք Ա Հ Ա Ն Ա Յ Ի Ն Ի Ս Բ Բ Ա Ջ Ն Ա Տ Ո Ի Ն Ն

Նշանակէ զիջումն Բանին Աստուծոյ ի յարգանդ Ամենօրհնեալ կուսին Մարիամու:

## Ջ Գ Ե Ս Տ Ա Ի Ո Ր Ի Լ Ն Ք Ա Հ Ա Ն Ա Յ Ի Ն

Նշանակէ զներմարմնութիւն Բանին Աստուծոյ ի յարգանդի Ամեներանուհւոյ կուսին Մարիամու:



## ԵՐԳԵԼՆ ԴՊՐԱՑ ՋԵՈՐՀՈՒՐԴ ԽՈՐԻՆ

Նշանակէ զաղօթս եւ զպաղատանս, զոր նախահայրքն մատուցանէին առ Աստուած վասն զալըստեանն Տեառն մերոյ:

### ԱՂՕԹՔ

Այս Մարգարէիցն ձայն խնկելի, որ զօրհնեալդ քո զալստեան զազատարարդ հրաման կանխաւ ազդէին, և զոր չէ բանիւ նիւթեղէն լեզուի ի թիւ արկանել վասն անբաւութեան, փոքունք են և նուազունք օրինակք և նմանութիւնք, հինք և ժամանակաւորք առ աւետեացդ քո յայտնութիւն և Խաչիդ փրկագործութիւն: Որ յամենայն վայրի կառուցեր զխորանն վկայութեան արեան քո ուխտի, որք մեծաբարբառ միշտ աղաղակեն քան զդատակնիք մահուն Հաբելի զյաղթանակ բարեաց քումդ հանդիսի ի կեանս կրկինս և անմահականս, շնորհաց, մկրտութեան, յարութեան, նորոգութեան, առ քեզ ընտանութեան, ընդ Հոգւոյդ Սրբոյ

միութեան, քաւութեան, ազատութեան, լուսաւորութեան, մշտնջենաւոր մաքրութեան, իսկապէս երանութեան, ընդ վերնայնոցն կցորդութեան անկապուտ փառաց. ի շրթունս մեր ձայնիւ բարձրելոյն հաշտեցուցիչ բանից աղաչանք: Եւ զոր ահաւորն է ասել, կարգեմ աստանօր յիշատակ եղեալ մեծիդ երախտեաց, Աստուած իսկ լինիլ ընտրութեամբ շնորհին, և ընդ հաստողիդ միանալ Տէրունի մարմնոյդ ճաշակմամբ, և ընդ լուսոյդ կենաց խառնութեամբ, զոր կատարումն երջանիկ խոստման ըստ Պօղոսի բանին, ոչ ունէր օրէնն: Այլ դու փրկութիւն, եկիր հայրենիդ քո հարստութեամբ, արարեր և կատարեցեր զյուսոյն երկարածգութիւն, որ առ քեզ պահեալ անհամառօտելի՝ քաւիչ ամենայնի: Եւ քեզ փառք ընդ Հօր քում, ի գովեստ բարեբանութեան Հոգւոյդ քո Սրբոյ, յաւիտենից. Ամէն:



Ե Լ Ա Ն Ե Լ Ն Ք Ա Հ Ա Ն Ա Յ Ի Ն  
Ի Ս Ր Բ Ա Ջ Ն Ա Տ Ա Ն Է Ն


Նշանակէ զԾնունդն եւ զՅայտնութիւն Տեառն մերոյ :


Գ Ն Ա Լ Ն Ք Ա Հ Ա Ն Ա Յ Ի Ն  
Ա Ռ Ա Ջ Ի Բ Ե Մ Ի Ն

Նշանակէ զգնալ Տեառն մերոյ ընդ աշակերտաց իւրոց ի լեառն Չիթենեաց :

Ա Ղ Օ Թ Ք

Տէր իմ Յիսուս Քրիստոս, որ ի մերձենալ ժամու չարչարանաց քոց՝ վասն տազնապաց ոգւոյդ սկսար երկնչիլ և հողալ, շնորհեա՛ մեղաւորիս՝ զի ամենայն զհոգս և զտրտութիւնս իմ՝ վերանուիրիցեմ քեզ պատիւ սրբազանից քոյոց չարչարանաց, և արդեամբք նոցին ընդունիցիմ զփրկութիւն հոգւոյ իմոյ :






Չայն Տեառն ի վերայ ջուրց  
եւ Ասուած փառաց որոսաց  
եւ Տէր ինն ի վերայ ջուրց բազմաց:

## ԼՈՒԱՆԱԼՆ ՔԱՀԱՆԱՅԻՆ ԶԶԵՌՆ

Նշանակէ զարտասուելն Տեառն մերոյ  
ի լերինն Զիթենեաց :



### ԱՂՕԹՔ

Տէր իմ Յիսուս Քրիստոս, որ ի յաղօթելն քո առ Հայր, փղծկամբ սրտի հեղեր զարտասուես յաչաց քոց ի լուացումն մեղաց նախահօրն . շնորհեա՛ մեղաւորիս զճշմարիտ զղջումն, զի զտիւ և զգիշեր ողբալով զյանցանս իմ և խոստովանելով զմեղս իմ՝ ընդունիցիմ զներումն և զթողութիւն յամենառատ աղբերէդ կենաց :

### ԱՍԵԼՆ ՔԱՀԱՆԱՅԻՆ

— ԽՈՍՏՈՎԱՆԻՄ ԱՌԱԶԻ —

Նշանակէ զանկանիլն Տեառն մերոյ ի վերայ երեսաց իւրոց, եւ զհեղուլն յինքենէ զքրտունս արեան :



Հայր, անցո՛ր յինե՛ն գրածակս:

## Ա Ղ Օ Թ Ք

Տէր իմ Յիսուս Քրիստոս, որ ի սաստկանալ երկանց քոց՝ զկայլակս արեան հոսեցեր ի մարմնոյ քուամէ, շնորհեա՛ մեղաւորիս՝ զի ի պատիւ չարչարանաց քոց, փոխանակ արեան՝ հեղից յաչաց իմոց զաղբիւրս արտասուաց:

## Ե Լ Ա Ն Ե Լ Ն Ք Ա Հ Ա Ն Ա Յ Ի Ն Ի Բ Ե Մ Ն

Նշանակէ զաղօթելն Տեառն մերոյ բազմիցս  
ի լերինն Չիթենեաց

## Ա Ղ Օ Թ Ք

Տէր իմ Յիսուս Քրիստոս, որ յաղագս անանդորրութեան սրտի քո՝ չոքար կրկին և երեքկին աղօթել առ Հայր քո երկնաւոր, շնորհեա՛ մեղաւորիս զյարատեւութիւն ի գործս բարիս, զի արժանի լինիցիմ ընդունել ի քէն զխնդրուածս իմ:

## Ա Ս Ե Լ Ն Ք Ա Հ Ա Ն Ա Յ Ի Ն

## — Ի Յ Ա Ր Կ Ի Ս Ր Բ Ո Ի Թ Ե Ա Ն —

Նշանակէ զծնրադրութիւն Տեառն մերոյ  
ի պարտիզի Չիթենեաց:

## ԱՂՕԹՔ

Տէր իմ Յիսուս Քրիստոս, որ ծուներ կրկնելով առ Հայր քո երկնաւոր՝ աղօթեցեր մարդկաբար՝ զի անցցէ ի քէն բաժակ չարչարանացն. շնորհեա՛ մեղաւորիս՝ զի յաւէտ ծուներ կրկնելով երկրպագանիցեմ կենսատուիդ իմում հոգւով և ճշմարտութեամբ :


ՀԱՄԲՈՒՐԵԼՆ ՔԱՀԱՆԱՅԻՆ  
ԶՍԵՂԱՆՆ

Նշանակէ զմատնիլն Տեառն մերոյ :

## ԱՂՕԹՔ

Տէր իմ Յիսուս Քրիստոս, որ համբուրիւ նենգութեան մատնեցար ի Յուդայէ. շնորհեա՛ մեղաւորիս՝ զի անխարդախ սրտիւ պաշտիցեմ զքեզ զամենայն աւուրս կենաց իմոց. և միշտ պատրաստ լինիցիմ առ ի կատարել զպաշտօն սիրոյ՝ ի դէմս սիրելեաց և ատելեաց իմոց :





Արժաքսիրուքեամբն մոլեալ Յուդա զիւր  
զմեծ զվարդապետն ընդ երեսուն  
արժաթոյ, Հրեիցն մասնէր:

## ԵՐԳԵԼՆ ԴՊՐԱՅ ԶՄԵՂԵԴԻ

Նշանակէ զխօսիլն Տեառն մերոյ քաղցրութեամբ  
ընդ Յուդայի՝ եւ ընդ ամփոխին ի պարտիզի:

### ԱՂՕԹՔ

Տէր իմ Յիսուս Քրիստոս, որ վասն  
փրկութեան իմոյ ընդ դաւաճանողաց թըշ-  
նամեաց քոց քաղցրութեամբ և հեզու-  
թեամբ անդորրաբար խօսեցար ընդ նոսա,  
շնորհեա՛ մեղաւորիս՝ զի ըստ օրինակի  
կենսատուիդ իմում ընդ ամենայն հալած-  
չաց իմոց և ատելեաց՝ համբերութեամբ և  
երկայնամտութեամբ վարիցիմ ի փառս ան-  
ուանդ քում սրբոյ:

## Ի ԶԱՆԵԼՆ ՔԱՀԱՆԱՅԻՆ

### Ի ԲԵՄԷՆ

Նշանակէ զկապիլն եւ զածիլն Տեառն մերոյ ի  
պարտիզէն Զիթենեաց ի պալատն Աննայի:

### ԱՂՕԹՔ

Տէր իմ Յիսուս Քրիստոս, որ ի յանո-  
ղորմից և ի յամբարշտաց Հրէից ըմբռնե-

ցար, կապեցար և ածար իբրև զպարտաւոր,  
չնորհեա՛ մեղաւորիս՝ զի արդեամբ չարչա-  
րանաց քոց՝ արձակիցիմ ի կապանաց մե-  
ղաց իմոց, և կապակցիցիմ սիրով ընդ քեզ  
հաստատապէս:

ԵՐ ՔԵԼՆ ԳՊՐԱՅ  
— ՈՐ ԳԵՐԱԳՈՅՆ —


Նշանակէ զաղաղակ դպրացն եւ փարիսեցւոց  
ի պալատին:

ԱՂՕԹՔ

Սոստովանիմ և հաւատամ ամենակա-  
տար, ինքնակատար և նախակատար, զհա-  
մագոյ եւ զպաշտելի, երկրպագելի եւ  
գերագոյ զամենասուրբ զԵրրորդութիւնն  
զՀայր և զՈրդի և զՍուրբ Հոգին: Հայր  
անձին և անսկիզբն՝ ծնող Որդւոյ և յառա-  
ջաքող Հոգւոյն Սրբոյ: Իսկ Որդին ծնեալ  
ի Հօրէ նախ քան զյաւիտեանս անմարմնա-  
բար և անժամանակապէս: Եւ Հոգին Սուրբ  
Բղխեալ ի Հօրէ անհատաբար և անսպառա-  
պէս, համագոյակից Հօր և փառակից Որդ-  
ւոյ: Միութեամբն բաժանեալ յերիս յան-

ձինս, և Երրորդութեամբն միացեալ ի մի բնութիւն և ի մի Աստուածութիւն: Եւ արդ՝ ազաչեմք զքեզ Հայր Երկնաւոր, միջնորդութեամբ միածնի Որդւոյ քո, և գթութեամբ Հոգւոյդ Սրբոյ, տուր մեզ, Տէ՛ր, Հոգի զգաստութեան, Հոգի խորհրդոյ, Հոգի հեզութեան, Հոգի զօրութեան, Հոգի իմաստութեան, Հոգի գիտութեան, Հոգի երկիւղի և աստուածպաշտութեան, և լիցամենայն բարեգործութեամբ, որպէս զի զկամս քո արարեալ յայսմ աշխարհի, եղիցուք արժանի ողորմութեան քում ի հանդերձելումն շնորհօքն Քրիստոսի. ընդ որում քեզ և Հոգւոյդ Սրբոյ վայելէ փառք, պատիւ և երկրպագութիւն յաւիտեանս յաւիտենից. Ամէն:

Տէր իմ Յիսուս Քրիստոս, որ հեզութեամբ և խոնարհութեամբ համբերեցեր խրոխտանաց և սպառնալեաց դպրաց և փարիսեցւոցն վասն փրկութեան իմոյ, շնորհեա՛ մեղաւորիս, զի երկայնամտութեամբ համբերիցեմ ընդդէմ ամենայն ոտնահարութեանց՝ երեւելեաց և աներեւութից թշնամեաց իմոց:



Զիմանալի լոյսդ ի գիշերին՝  
ջահիւք եւ սուսերօք եկեալ  
ըմբռնել զանըմբռնելիդ :

## Գ Ա Ռ Ն Ա Լ Ն Ք Ա Հ Ա Ն Ա Յ Ի Ն Ի Բ Ե Մ Ն

Նշանակէ զտանիլն Տեառն մերոյ ի պալատն  
Պիղատոսի :

### Ա Ղ Օ Ք Ք

Տէր իմ Յիսուս Քրիստոս, որ ի քահանայիցն և ի ծերոցն մատնեցար իբրև զմահապարտ ի ձեռն Պիղատոսի, շնորհեա՛ մեզ աւորիս զի զօրութեամբ շնորհաց քոց ազատիցիմ ի մատնութենէ ի ձեռս իշխանին խաւարայնոյ և արբանեկաց նորին :

## Ե Ր Գ Ե Լ Ն Դ Պ Ր Ա Յ Զ Շ Ա Ր Ա Կ Ա Ն


Նշանակէ զամբաստանութիւն եւ զչարախօսութիւն  
ամբոխին ժողովելոյ :

### Ա Ղ Օ Ք Ք

Իւզ թափեալ անուն՝ միաժին Որդի Աստուծոյ՝ Աստուած ճշմարիտ, որ յանճառական փառաց խոնարհեցար ի հայրական ծոցոյ, և առեր զմարմին ի սուրբ և յանչաղախ կուսէն Մարիամայ. եղեր մարդ ճշմարտապէս՝ անփոփոխելիղ ի յէութեան,

անցանելով ընդ ամենայն կիրս մարդկային՝  
բաց ի մեղաց. ի յերկրի երեւեցար և ընդ  
մարդկան շրջեցար, և կատարեցեր զամե-  
նայն ըստ օրինացն. լրումն լինելով Մար-  
գարէից և օրինաց. զանիմանալի և զան-  
հասանելի անուշահոտութիւն Աստուածու-  
թեանդ բուրեցեր յաշխարհի՝ հաղորդելով  
զամենեսեան երկնաւոր և առատաբաշխ  
պարգևիդ, ի յոր կցորդիլն զմայլեալ ան-  
մահացան տիեզերք: Եւ արդ՝ դու նոյն  
ինքն բարերար եւ բազումողորմ, բաց  
զքիմս մտաց իմոց հոտոտիլ ի հոտոյ անու-  
շից մարմնոյ Աստուածութեան քո, և ըն-  
կա՛լ զաղօթս մեր իբրև զխունկ անոյշ և  
որպէս զՊատարագն Աբելի, Նոյի և Աբ-  
րահամու, և իբրև զբանաւոր պատարագս  
սրբոց քոց և սիրողաց անուան քո, որք  
ի սկզբանէ հաճոյ եղեն քեզ, որոց մասին  
և մեզ լիցի ժառանգութիւն շնորհօք Միած-  
նիդ, այժմ և միշտ և յաւիտեանս յաւի-  
տենից. Ամէն:

---



Ածին զնա առ Պիղատոս :



## ՇՐՋԱԲԵՐԵԼՆ ՔԱՀԱՆԱՅԻՆ ԶՍՈՒՐԲ ԱԻԵՏԱՐԱՆՆ

Նշանակէ զշրջաբերումն Տեառն մերոյ ի տանէն Պի-  
ղատոսի առ տունն չերովդի :

### Ա Ղ Օ Թ Ք


#### ՅԵՏ ՍՈՒՐԲ ԱՍՏՈՒԱԾԻՆ

Սուրբ Աստուած անմահ և հզօր . որ  
սրբաբանեալ պաշտիս ի հրեղէն և անմար-  
մին զուարթնոցն , անլուելի և անդադար  
օրհնաբանութեամբ . զոր եւ Սերովբէքն  
սոսկալի և ահեղագոչ ձայնիւ երգեն զերգս  
երեքսրբեան՝ բարեբանելով զանմահ Տէ-  
րութիւնդ , և Քերովբէքն զովասանական  
ձայնիւ փառաւորեն զանբաւազօր Աստուա-  
ծութիւնդ , և ամենայն զօրութիւնքն վեր-  
նական գոհաբանեն երկրպագութեամբ , փա-  
ռաւորելով զամենազօր Թագաւորութիւնդ :  
Ընդ որս և մեք բանաւոր հօտ քո , և ըս-  
տեղծուածք անարատ ձեռաց քոց , ժողով-  
եալ ի գաւիթ սուրբ Եկեղեցւոյ քո՝ կալով  
առաջի Աստուածընկալ սուրբ Սեղանոյս՝  
տկար անձամբ և մեղաւոր շրթամբք եր-



Եւ ծեծեին զգլուխն նորա եղեգամբ  
եւ թփանեին ընդ երեսս :

գեմք զերգս երեքսրբեան սրբասացու-  
 թեամբ, եւ աղաչեմք զառատաբաշխ գը-  
 թութիւնդ. ընկալ զպտուղ շրթանց եւ  
 զբանաւոր Պատարագս սրտից մերոց ի հա-  
 ճոյս քո ըստ վերնոցն արժանաւորութեան,  
 և թող մեզ զամենայն յանցանս մեր, ըզ-  
 կամայ և զակամայ, զգիտութեան և զան-  
 գիտութեան, զմտաց եւ զխորհրդոց, ըզ-  
 բանից և զգործոց, զհոգւոց և զմարմնոց,  
 եւ զամենայն մասանց անդամոց, որպէս  
 զի լիցի մեզ կարողութիւն արժանապէս  
 օրհնել զքեզ և գովել զանուն քո սուրբ:  
 Տո՛ւր մեզ, Տէր, մաքրութիւն մտաց,  
 զղջումն սրտից, ճշմարտութիւն շրթանց,  
 զարտասուս աչաց, ամբժութիւն հոգւոց,  
 և սրբութիւն մարմնոց: Լցո՛ զմեզ ամե-  
 նայն առաքինութեամբ, պայծառ հաւա-  
 տով, աներկբայ յուսով և մաքուր սիրով:  
 Եւ զարդարեա՛ զմեզ խոհեմութեամբ, ող-  
 ջախոհութեամբ, արիութեամբ և արդա-  
 րութեամբ: Զօրացո՛ զմեզ յաղթող լինիլ  
 ընդդէմ հնարից բանսարկուին, եւ զամե-  
 նայն նետս մուխս չարին շիջուցանել. ար-  
 դարութեամբ եւ աստուածպաշտութեամբ



Եհարց ցնա Պիղատոս եւ ասէ  
Դո՞ւ ես թագաւորն Հրէից:

կալ մնալ յաշխարհի ըստ հաճոյից և ըստ կամաց քոց, և յետ աստի կենացս զանճառ բարիսն վայելել Տերամբ մերով. որում փառք և զօրութիւն յաւիտեանս. Ամէն:

Տէր իմ Յիսուս Քրիստոս, որ վասն իմ ի յանօրինաց արհամարհեցար և այպանեցար. շնորհեա՛ մեղաւորիս զի օգնութեամբ սրբազանից քոյոց չարչարանաց զերծանիցիմ ի խայտառակութենէ սարսափելի հրապարակին:

---

ԸՆԹԵՌՆՈՒԼ ԶԳԻՐՍ ՄԱՐԳԱՐԷԱԿԱՆՍ  
ԵՒ ԶԱՌԱՔԵԼԱԿԱՆՍ

Նշանակէ զհարցաբնութիւն չերովդէի եւ Պիղատոսի:

Ա Ղ Օ Թ Ք

ՅԵՏ ՈՒՆԿՆԻՐՈՒԹԵԱՆ ԸՆԹԵՐՑՈՒԱԾՈՅՆ

Տէր իմ Յիսուս Քրիստոս, որ վասն իմ իբրև զպարտաւոր և վնասագործ կացեր ի յատենի դատաւորացն մեծաւ խոնարհութեամբ, շնորհեա՛ մեղաւորիս, զի ի միւսանգամ քո զալստեանն զուարթերես մատչիցիմ առ դատաւորդ իմ երկնաւոր:

## ԸՆԹԵՌՆՈՒԼ ԶՍՈՒՐԲ ԱԻԵՏԱՐԱՆՆ

Նշանակէ զպատասխանիս Տեառն մերոյ,  
զոր ետ Պիղատոսի:

### Ա Ղ Օ Թ Ք

#### ՅԵՏ ՈՒՆԿՆԻՐՈՒԹԵԱՆ ԸՆԹԵՐՑՈՒԱԾՈՅՆ

Տէր իմ Յիսուս Քրիստոս, որ կալով  
առաջի Պիղատոսի՝ վկայեցեր ճշմարտու-  
թեան, շնորհեա՛ մեղաւորիս, զի հաւատով  
և սիրով քո ամբացեալ՝ ոչ երկիցիմ ի յա-  
նօրինաց և ի յանհաւատից բռնաւորաց,  
այլ համարձակապէս խոստովանիմ զքեզ  
Աստուածդ իմ ճշմարիտ՝ մարմնացեալ,  
չարչարեալ և խաչեցեալ վասն փրկութեան  
իմոյ:

## ԸՆԹԵՌՆՈՒԼՆ ԶՀԱԻԱՏԱՄՔՆ

Նշանակէ զուրացումն Պետրոսի առաքելոյն:

### Ա Ղ Օ Թ Ք

#### ՅԵՏ ԶՈՅԳ ԱՍՈՒԹԵԱՆ «ՀԱԻԱՏԱՄՔ» ԻՆ

Տէր իմ Յիսուս Քրիստոս, որ ըստ աստ-  
ուածայնոյ քում՝ տրամադրութեան՝ թոյլ

ետուր Պետրոսի զքեզ մարդկապէս ուրա-  
նալ. շնորհեա՛ մեղաւորիս, զի զքեզ միշտ  
ընդ Հօր և ընդ Հոգւոյդ սրբոյ՝ մի Աստ-  
ուած ճշմարիտ խոստովանիցիմ, եւ հա-  
ւատայցեմ եւ դաւանիցեմ:

---

ԴԱՌՆԱԼՆ ՔԱՀԱՆԱՅԻՆ ԱՌ ԺՈՂՈՎՈՒՐԴՍ  
ԱՍԵԼՈՎ «ԽԱՂԱՂՈՒԹԻՒՆ»

Նշանակէ զդառնայն Տեառն մերոյ առ Պետրոս:

Ա Ղ Օ Թ Ք

Տէր իմ Յիսուս Քրիստոս, որ աստուա-  
ծայնով քով զթուլթեամբդ դարձար և ակ-  
նարկեցեր առ Պետրոս՝ տալով նմա զղջումն  
և զյօրդումն արտասուաց. շնորհեա՛ մեղա-  
ւորիս զճշմարիտ զղջումն սրտի, զի զտիւ  
և զգիշեր ողբալով զսխալանս իմ՝ ընդու-  
նիցիմ զներումն և զթողութիւն ամենայն  
մեղաց իմոց:

ԱՌՆՈՒԼՆ ՍԱՐԿԱԻԱԳԻՆ  
Ի ԳԼԽՈՅ ՔԱՀԱՆԱՅԻՆ ԶՍԱՂԱԻԱՐՏՆ

Նշանակէ զմերկացուցանելն Տեառն մերոյ  
ի զինւորաց :

Ա Ղ Օ Թ Ք

Տէր իմ Յիսուս Քրիստոս, որ վասն փրկու-  
կութեան իմոյ զգեստս նախատանաց զգե-  
ցար, գանից և ապտակաց համբերեցեր .  
չնորհեա՛ մեղաւորիս, զի ի ձեռն ապաշ-  
խարութեան մերկանայցեմ յինէն զգեստս  
պղծութեան, և զգենուցում զչնորհդ քո  
երկնային և կապակցեցայց ընդ քեզ, զի  
դու ես վերականգնիչ իմ :

ԵՐԳԵԼՆ ԴՊՐԱՅ ԶՍՐԲԱՍԱՑՈՒԹԻՒՆՆ

Նշանակէ զկատակիլն Տեառն մերոյ ի զինւորաց :

Ա Ղ Օ Թ Ք

Տէր մեր Յիսուս Քրիստոս, Որդի Աս-  
տուծոյ եւ Բան Հօր, որ ըստ անճառ բա-  
րերարութեան քո ոչ կամեցար անտես առ-






Զգեցուցին նա փամիդ կարմիր եւ  
ծիրանի եւ պսակ ի փոց ի գլուխ  
նորա եւ այպն արարեալ ասեին .  
ողջ լեր արֆայդ Հրեից .

նել զարարածս ձեռաց քոց, այլ մարդա-  
 սիրապէս գթացար յազգս մարդկան. խո-  
 նարհեցար ի հայրական ծոցոյ է՛դ՝ Աստու-  
 ուած, առեր զմարմին ի սուրբ կուսէն Մա-  
 րիամայ կամաւ Հօր և հաճութեամբ սուրբ  
 Հոգւոյն, զամենայն զմարդկայինս յանձն  
 առեր կրել բաց ի մեղաց և զաստուածա-  
 յին մարմինդ քո ետուր փրկանս փոխանակ  
 բազմաց, ըստ կանխասացութեան անշուշտ  
 հրամանի քո՝ խաչի և մահու համբերելով:  
 Հովիւդ քաջ, զանձն քո եղեր ի վերայ  
 բանաւոր հօտի քո, ժողովել զցրուեալսն  
 ի փարախ կաթողիկէ սուրբ Եկեղեցւոյ քոյ,  
 լինիլ մի հօտ և մի հովիւ: Վասն որոյ՝  
 մեք ժողովուրդք և խաչն արօտի քո՝ երկ-  
 րամած դիմօք խոնարհեալ և ի ծունկս ան-  
 կեալ աղաչեմք զամբաւ մարդասիրութիւն  
 քո. մի՛ թողուր զմեզ ի ձեռաց քոց, և մի՛  
 անտես առներ զամբիծ արեամբ քո փրկեալ  
 հօտս. մի՛ տար զմեզ ի փորձ թշնամւոյն  
 և հակառակորդին մերոյ. սրբեա՛ զմեզ ի  
 մեղաց և մաքրեա զմեզ յամենայն անօ-  
 րէնութեանց մերոց. լուա՛ զսիրտս մեք ի  
 խղճէ չարեաց, և փրկեա զմեզ յանիրա-

ւութեանց . լոյս տուր , Տէր , աչաց մերոց ,  
 զի մի՛ երբեք ննջեսցուք ի մահ , եւ մի՛  
 լիցի տեղի պարծանաց թշնամւոյն , այլ  
 խորտակեալ ջաղխեսցի զլուխ նորին զօ-  
 րութեամբ ամենայաղթ Սաչի քո , և տը-  
 կարասցին զօրութիւնք մեքենայից նորա :  
 եւ տուր մեզ անարգել և անբռնադատ վը-  
 ճարել զկեանս մեր ամենայն արդարու-  
 թեամբ՝ հետևելով լուսոյ շաւղաց և երկ-  
 նաչու ճանապարհին . ի վայրի դալարւոջ  
 բնակեցո՛՛ զմեզ և առ ջուրս հանգստեան  
 սնո՛ . զի տեսցէ թշնամին և ամաչեսցէ , զի  
 քո եմք ստեղծեալք և քո եմք փրկեալք .  
 դու ես օգնական և Փրկիչ մեր , զի բաց  
 ի քէն զայլ ոք ոչ գիտեմք և զանուն քո ,  
 Տէր , կարդամք զօրհանապազ . մի՛ թողուր  
 զժառանգութիւն քո ի ձեռաց քոց , այլ ամ-  
 մենազօր աջ քո՝ լիցի հովանի և պահա-  
 պան ի վերայ պաշտօնէից քոց բարեխօ-  
 սութեամբ սուրբ Աստուածածնին և ամե-  
 նայն սրբոց քոց , քեզ փառք յաւիտեանս .  
 Ամէն :

Տէր իմ Յիսուս Քրիստոս , որ վասն իմ  
 փշով պսակեցար , և եղեգամբ գանեցար ի



Ահա այրդ ցձեզ:

Հրէից . շնորհեա՛ մեղաւորիս , զի զօրու-  
թեամբ սրբազանից քոյոց չարչարանաց  
զերծանիցիմ ի փշոց մեղաց՝ և մերկանայ-  
ցեմ զամենայն հանդերձս չարութեան , և  
լինիցիմ քեզ ճշմարիտ երկրպագու՝ մինչ  
ի վախճան կենաց իմոց :

---


## ՇՐՋԱԲԵՐԵԼՆ ՔԱՀԱՆԱՅԻՆ ԶԸՆԾԱՅՍՆ

Նշանակէ զածիլն Տեառն մերոյ ի Պիղատոսէ  
արտաքս առ Հրէայս :

## Ա Ղ Օ Թ Ք

Տէր իմ Յիսուս Քրիստոս , որ վասն  
փրկութեան իմոյ ածիս այսր և անդր իբրև  
զգառն անմեղ , և իբրև զօրով առաջի կը-  
տըրչի անմռունչ կաս . շնորհեա՛ մեղաւո-  
րիս՝ զի ամենայն վշտաց և տառապանաց  
կենցաղոյս ի փառս անուանդ քում սրբոյ  
առանց ձանձրանալոյ համբերիցեմ :

---



Ի խաչ հան զդա...

## ԼՈՒԱՆԱԼՆ ՔԱՀԱՆԱՅԻՆ ԶԶԵՌՍՆ

Նշանակէ զլուանայն Պիղատոսի զծեռս իւր ի վկայութիւն անմեղութեան Տեառն մերոյ :

### Ա Ղ Օ Թ Ք

Տէր իմ Յիսուս Քրիստոս, որ ի յանիրաւ դատաւորէն Պիղատոսէ լուացմամբ ձեռաց նորին՝ անմեղ, անպարտ գոլ վկայեցար. շնորհեա՛ մեղաւորիս զի զամենայն աւուրս կենաց իմոց ի մէջ զանազան փորձութեանց ալեաց ծովու աշխարհիս՝ անմեղութեամբ կենցաղավարիցեմ ի փառս քո :

---

## ՈՂԶՈՅՆ ՏԱԼՆ ՄԻՄԵԱՆՑ ԱՍԵԼՈՎ ՈՂԶՈՒՆԱՏՈՒԻՆ

«Քրիստոս ի մեջ մեր յայտնեցաւ»

ԵՒ ԱՍԵԼՆ ՈՂԶՈՒՆԸՆԿԱԼԻՆ

«Օրհնեալ է յայտնութիւն Քրիստոսի»

Նշանակէ զհաշտութիւն Պիղատոսի եւ չերովդէի :

## ԱՂՕԹՔ

Միջնորդ Աստուծոյ և մարդկան, Տէր մեր Յիսուս Քրիստոս, որ ամենաբարի եւ խաղաղարար միջնորդութեամբ քով հաշտեցուցեր զՀայր ընդ արարածս, և արարեր խաղաղութիւն երկնաւորաց և երկրաւորաց, հեռաւորաց եւ մերձաւորաց եւ զնոյն խաղաղութիւն շնորհեցեր Եկեղեցւոյ քո ասելով, զխաղաղութիւն թողում ձեզ, զխաղաղութիւն զիմ տամ ձեզ: Եւ այժմ, Տէր, աղաչեմք զքեզ՝ զերկնաւոր եւ ըզհաշտարար խաղաղութիւն քո պարգեւեա՛մեզ, զի խաղաղութեամբ և հանդարտութեամբ վարեսցուք զկեանս մեր առանց մեղաց և առանց գայթակղութեան, և սուրբ սրտիւ սիրել զմիմեանս որպէս դու զմեզ սիրեցեր. դնել զանձն ի վերայ ընկերին, որպէս դու եդեր. եւ լինել առ միմեանս զթածք, քաղցունք և բարերարք, որպէս դու արարեր. հնազանդութեամբ և խոնարհութեամբ ծառայել միմեանց, որպէս դու խոնարհեցար ի ծունկս քոյոց աշակերտացն. որով մարթասցուք լինիլ պատշաճապէս



անդամք և մարմին գլխոյդ մերոյ: Եւ դու, Տէր, ասացեր՝ թէ ուր երկու և երեք ժողովեալ են յանուն իմ, անդ եմ ես ի մէջ նոցա: Վասն որոյ և մեք ժողովեալ յանուն քո ի գաւիթ սուրբ, կաթողիկէ և առաքելական եկեղեցոյ, և Աստուածային և սուրբ ողջունիւս եղեալ մի անձն և մի սիրտ, ըստ սրբոց Առաքելոցն: Լո՛ւր աղաչանաց մերոց, մարդասէր Տէր, եւ բռնակեա՛ ի սիրտ եւ յոգի ժողովելոցս յանուն քո: Սրբեալ մաքրեա՛ եւ յարդարեա՛ զմեզ լինել տաճար և բնակարան ամենազօր շնորհաց քոց. հեռացո՛ ի մէջ զամենայն խորամանկութիւն եւ զնենգութիւն թշնամւոյն, զի սուրբ սրտիւ եւ մաքուր մտօք, երկիւղիւ եւ արդարութեամբ զօրհանապազ փառաւորեսցուք զամենազօր անուն քո, այժմ եւ միշտ եւ յաւիտեանս յաւիտենից. Ամէն:

Տէր իմ Յիսուս Քրիստոս, որ քոյով կենարար չարչարանօքդ պատճառ եղեր հաշտութեան անիրաւաց դատաւորացն. շնորհեա՛ մեղաւորիս, զի ի բաց լքեալ զամենայն խռովութիւնս և զոխակալութիւնս

ընդդէմ ամենայն հաւատացելոց եղբարց  
խմոց, սիրով եւ խաղաղութեամբ կենցա-  
ղավարիցեմ:



**ԱՍԵԼՆ ՔԱՀԱՆԱՅԻՆ ԶԵՐԵՔՍՐԲԵԱՆՆ**  
Նշանակէ զերիս սուտ վկայսն, որք վկայեցին  
անյարմարապէս:

### Ա Ղ Օ Թ Ք

Սո՛ւրբ, Սո՛ւրբ, Սո՛ւրբ, Տէ՛ր զօրու-  
թեանց, լի են երկինք և երկիր փառօք քո:  
Սերովբէքն աղաղակեն հրաշալի եւ հոգե-  
ղէն բարբառով առաջի փառաց աթոռոյ  
Աստուածութեան քո. քանզի զարհուրեալ  
ի հիասքանչ և ի հրաշալի փառաց քոց, ոչ  
ունելով կարողութիւն արժանապէս փա-  
ռաւորել զանհասանելի մեծութիւն քո:  
Վասն որոյ անլռելի եւ անդադար օրհնա-  
բանութեամբ փառաւորեն զմիասնական  
Աստուածութիւնդ, զպաշտելի եւ զհամա-  
գոյ Երրորդութիւնդ: Արդ՝ եթէ հրեղէնքն  
եւ անիմանալիքն չեն բաւական քոյոյ ան-

քաւութեան, մեք հողանիւթեայքս և յերկիր կործանեալքս՝ զիա՞րդ կարասցուք բովանդակել բանիւ զանբաւելի զթութիւնդ առ արարածս, եւ մանաւանդ առ ազգս մարդկան: Որ նախ ՚ի սկզբանն արարչագործ ձեռամբդ ստեղծեր զնախնին մեր զԱդամ, պատուելով զնա քան զայլ արարածս՝ որ բանիւ միայն արարան, եւ յետ պատուիրազանցութեան պտղոյն ճաշակման ո՛չ արարեր անտես զանկեալ բնութիւնս, այլ ետուր զօրէնս եւ առաքեցեր զՄարգարէս՝ յայտնելով զօգուտն, իսկ պատըրեալքն ի պատրողէն ոչ ծանեան զխորհուրդ բարերար կամաց քոց: Ապա Հայրդ երկնաւոր կամելով յայտ առնել զանճառական սէրդ կապակցութեամբ Հոգւոյդ Սրբոյ, առաքեցեր զմիածին եւ զծոցածին Բանդ, որ եկեալ մարմնացաւ ի սուրբ Կուսէն, եւ նովին մարմնովն համբերեաց չարչարանաց, Խաչի եւ մահու, եւ եղեւ քաւութիւն մեղաց մերոց: Վասն որոյ մեք ընդ Սերովբէիցն երգեմք նմա ասելով՝ Սուրբ, Սուրբ, Սուրբ, Տէր զօրութեանց, լի են երկինք եւ երկիր փառօք քո՝ օրհնութիւն ի բար-

ձունս . օրհնեալ 'է գալուստ քո յաշխարհս  
 ի փրկութիւն մեր Քրիստոս Աստուած մեր .  
 օրհնեալ է կենսաբեր տնօրէնութիւն քո .  
 օրհնեալ է փրկաւէտ չարչարանք քո՝ որով  
 զերծաք ի չարչարանաց եւ յանչարչարու-  
 թիւն վիճակեցաք : Օրհնեալ է կենդանա-  
 րար մահն քո , որով փրկեցաք ի դառն  
 մահուանէ , եւ յանմահութիւն երկնից վե-  
 րափոխեցաք . որ յաւէրժական գոհարանու-  
 թեամբ մատուցուք փառս և երկրպագու-  
 թիւն բարերարիդ՝ փրկչիդ եւ նորոգողիդ՝  
 յաւիտեանս յաւիտենից . Ամէն :

---

## ԿՈԶԵԼՆ ՔԱՀԱՆԱՅԻՆ

«Առեմ կերեմ»

Նշանակէ զբանն Պիղատոսի որ ասաց չրէից , առէք  
 զսա դուք՝ եւ ըստ ձերոց օրինացն դատեցէ՛ք :

## Ա Ղ Օ Թ Ք

Օրհնեալ է պարգեւատուն կենաց , եւ  
 պարգեւն անմահութեան՝ Քրիստոս Աստ-  
 ուած մեր :

---

## Ա Ղ Օ Թ Ք

## ՅԵՏ ԱՍԵԼՈՅ

«Արբեք ի սմանե»


Օրհնեա՛լ է շնորհն ձրի, եւ պարգեւն  
անձախելի, կենդանի և կենդանարար Մար-  
մին եւ Արիւն Քրիստոսի Աստուծոյ մերոյ:

## Ա Ղ Օ Թ Ք

## ՅԵՏ ՀԱՅՐ ԵՐԿՆԱԻՈՐԻՆ

ՀԱՅՐ ԵՐԿՆԱԻՈՐ, բարերար եւ բա-  
զումողորմ Աստուած, տուող բարեաց եւ  
պարգեւիչ կենդանութեան, որ ամենա-  
բարի բնութեամբդ՝ յաղթեցար ի մարդա-  
սիրութենէ, մինչ զի զհամագոյակից և զա-  
րարչակից, զաթոռակից եւ զհաւասարա-  
կից Բանդ՝ առաքեցեր յաշխարհ, առ ի  
մարմնանալ ի սուրբ Կուսէն՝ եւ նովին ան-  
մեղ եւ անպարտական մարմնովն՝ եղև զին  
եւ փրկանք ամենայն աշխարհի. զի ետուր  
զնա ի զենումն, ի մահ եւ ի փրկութիւն  
վասն ամենայն հաւատացելոց անուան ջո

մեծի: Եւ այժմ աղաչեմք զքեզ, միջնորդութեամբ Մարմնոյ և Արեան Միածնի քահայեա՛ց ի հեղումն սուրբ Արեան նորա, և յանչնչութիւն նորա ի խաչին ի բացումն փրկական աղբերաց նորա, և արեամբ թաթաւումն սուրբ մարմնոյ նորա, եւ անցո՛ ի մէնջ զցասումն պատուհասի յանցանաց մերոց բարերարութեամբ քով, զի նորա եմք փրկեալ. խնայեա՛ ի գինս սուրբ Արեան Միածնի քո, եւ ողորմեա՛ բանաւոր հօտի քոյ՝ յուսացելոցս յանուն քո:



## ԱՌՆՈՒԼՆ ՔԱՀԱՆԱՅԻՆ

## ԶԸՆԾԱՅՍ Ի ՉԵՌՍՆ


Նշանակէ զգանիլն եւ զճաղիլն Տեառն մերոյ  
ի Պիղատոսէ եւ ի զինւորաց նորին :

## Ա Ղ Օ Ք Ք

## ՅԵՏ ՅԱՄԵՆԱՅՆԻ

Արժանապէս օրհնեմք զքեզ , եւ ար-  
դարապէս գովեմք և գոհանամք զքէն Տէր  
Աստուած մեր , որ ըստ բազում ողորմու-  
թեան քում անտես արարեր զանարժան  
գործս մեր , եւ այսմ շնորհի արժանաւորս  
կացուցեր , վասն միջնորդութեան Մարմնոյ  
և Արեան Միածնի քո . հաղորդս արա՛ փա-  
ռաց Աստուածութեանդ քո , միաւորելով  
ընդ գերապատիւ ճոխութեանդ քո : Վասն  
որոյ՝ յամենայնի օրհնեմք , եւ ըստ ամե-  
նայնի գոհանամք զքէն զօրհանապազ ,  
Տէր Աստուած մեր . ողորմեա՛ մեզ :

---



Եւ թեալ ի նա . . . .  
ծեծեին զգլուխ նորա :



ԽԱԶԱԿՆՔԵԼՆ ՔԱՀԱՆԱՅԻՆ  
Ի ՎԵՐԱՅ ՄԱՐՄՆՈՅ ԵՒ ԱՐԵԱՆ

Նշանակէ գրեւեռելն փրկչին ի գինւորաց  
ի վերայ Սրբոյ Խաչին :

Ա Ղ Օ Թ Ք

Տէր իմ Յիսուս Քրիստոս, որ վասն  
փրկութեան իմոյ տարածեցեր զբազուկս  
քոյ արարչագործս, եւ ի վերայ Խաչափայ-  
տին բեւեռեցար շնորհեա՛ մեղաւորիս, զի  
զթախծեալ սիրաս իմ սիրով ընդ քեզ բե-  
ւեռիցեմ, եւ մի՛ երբեք ի քէն մեկուսաց-  
եալ հեռանայցեմ :

Ա Ղ Օ Թ Ք

ՅԵՏ ՈՐԴԻ ԱՍՏՈՒԾՈՅ


Հաց կենաց եւ բաժակ անմահութեան,  
միածին Որդի Աստուծոյ, Տէր մեր և ՓԸՐ-  
ԿԻՉ ՅԻՍՈՒՍ ՔՐԻՍՏՈՍ՝ Աստուած ճշմա-  
րիտ, մանանայդ երկնային իջեալ ի վե-  
րուստ, եղեր կերակուր ամենայն հաւա-



Զձեռս եւ գոսս իմ ծակեցին, ըստ յայնապէս  
Դաւթեան ձայնին, զփայտ խաչին բեւեռեցին:

տացելոց քոց . հեղմամբ Արեան քոյ ողորմեա՛ բանաւոր հօտի քո , շնորհելով զթողութիւն յանցանաց հաւատացելոց . ի մահու լեր փրկութիւն հաւատացելոց , և արժանապէս ճաշակողաց զՄարմին և զԱրիւնքո սուրբ : Յիշեա՛ զփրկաւէտ չարչարանսն քո եւ զկենսատու մահն , զարեամբ ճապարկումն ի Խաչին և զանտանելի կիրսն , զոր ընկալար ի մարմնիդ վասն մեր : Նայեա՛ց ի խոցուածս արարչագործ ձեռաց եւ ոտից քոց , եւ ի բացումն կենարար վտակին՝ որով նորոգեցան տիեզերք եւ արբեցան արարածք : Նովին վտակօքն լուա՛ եւ մաքրեա՛ զմեզ յամենայն մեղաց մերոց , եւ թող մեզ զամենայն յանցանս մեր : Խնայեա՛ Արեամբքո փրկեալ հօտի , եւ այց արա մեզ ի միւսանգամ գալստեան արքայութեան քում . զի մահուամբ եւ չարչարանօք փրկեցեր , Քրիստոս Աստուած մեր , բարերար եւ նորոգող . եւ քեզ փառք եւ երկրպագութիւն յաւիտեանս յաւիտենից . Ամէն :

---




Խաչին վերայ բազկատարած երկնագետ,  
Գլուխն համակ արիւնամած փրշաւետ.  
Ո՛հ, դա՛ անոյշ Փրկիչն է իմ՝ իմ հոգւոյս,  
Դա՛ արարիչ, դա՛ կեանք անմահ իմ Յիսուս:

## ԱՂՕԹՔ

## ՅԵՏ ՀՈԳԻ ԱՍՏՈՒԾՈՅ

ՀՈԳԻ ԱՍՏՈՒԾՈՅ՝ Աստուած ճշմարիտ ,  
 որ նախ ի սկզբանն շրջէիր ի վերայ ջուրց ,  
 եւ ստեղծանէիր զարարածս յոչընչէ , եւ  
 պէսպէս հրաշսն գործեցեր յաւուրս Մար-  
 զարէիցն . եւ ի ժամանակի տնօրէնութեան  
 էակցին քո՝ իջեր ի Յորդանան եւ ի վեր-  
 նատունն , լցեր զԱռաքեալսն բազմապա-  
 տիկ շնորհօք : եւ այժմ աղաչեմք զքեզ ,  
 միջնորդութեամբ սուրբ Մարմնոյ եւ Արեան  
 փառակցին քո՝ որ բազմեալ կայ ի վերայ  
 սրբոյ Սեղանոյս , է՛ջ ի սիրտս եւ յոգիս  
 մեր , եւ մաքրեա՛ զմեզ իբրեւ զԱռաք-  
 եալսն ի սուրբ Վերնատանն , եւ բորբոք-  
 եա՛ ի մեզ զկայծ սիրոյ աստուածութեանդ ,  
 զի արժանապէս լիցուք տաճար եւ բնակա-  
 րան քեզ եւ էակից Փառակցացդ . եւ ամե-  
 նազօր շնորհիւ քո՝ լիցուք փրկեալք յա-  
 ւուր նորոգման մերոյ , եւ քեզ նորոգողիդ  
 Աստուծոյ՝ վայելէ փառք յաւիտեանս .  
 Ամէն :

---



Ի մեջ երկուց անօրինաց  
Կայր մերկացեալ տուողն օրինաց :

## ԿԱԼՆ ՍԱՐԿԱԻԱԳԱՑ ՅԱԶՄԷ ԵՒ ՅԱՀԵԿԷ

Նշանակէ գերկուս աւազակս խաչեցեալս  
յաջմէ եւ յահեկէ Տեառն մերոյ :

### Ա Ղ Օ Թ Ք

Տէր իմ Յիսուս Քրիստոս, որ վասն  
փրկութեան իմոյ ընդ անօրէնս համարեցար,  
եւ երջանիկ աւազակին զարքայութիւն քո՝  
խոստացար. շնորհեա՛ մեղաւորիս զի յեւա-  
նեւն հոգւոյս ի մարմնոյս, արժանի լինիցիմ  
չսեւ զձայն քո Աստուածային երանաւէտ :

---

## ԱՍԵԼՆ ՔԱՀԱՆԱՅԻՆ

«Ընդ որս եւ մեզ»

Նշանակէ զդաւանումն աւազակին, եւ ասելն  
յիշեա՛ զիս, Տէր, յարքայութեան քում :

### Ա Ղ Օ Թ Ք

Տէր իմ Յիսուս Քրիստոս, որ բացեր  
զաչս մտաց աւազակին, զի զքեզ Տէր եւ

Աստուած իւր գոլ հաւատայր. շնորհեա՛  
մեղաւորիս զբացումն աչաց սրտի իմոյ, զի  
զքեզ ընդ Հօր եւ ընդ Հոգւոյդ Սրբոյ գոլ  
մի Աստուած հաւատայցեմ. և արքայու-  
թեանդ քում սրբոյ արժանի գտանիցիմ,  
եւ ընդ Եկեղեցւոյն խրախուսելով՝ քեզ  
փառս եւ երկրպագութիւնս վերառաքիցեմ:

## Ա Ղ Օ Թ Ք

### Ի ԺԱՄՈՒ ԱՌԱՔԵԼՈՑԻՆ

Յիշեա՛, Տէր, եւ ողորմեա՛, եւ օրհ-  
նեա՛ զուխտ եւ զժառանգութիւն Եկեղեց-  
ւոյ քում սրբոյ, եւ շնորհեա՛ մեզ զերկ-  
նային քո զխաղաղութիւն, զի մի՛ լիցի ի  
մեզ տեղի եւ մուտ չարին. հեռացո՛ ի  
մէնջ զամենայն խարդախութիւն թշնամ-  
ւոյն, եւ զբռնութիւն նորա խորտակեա՛  
բարեխօսութեամբ եւ յիշատակաւ սրբուհ-  
ւոյ Աստուածածնին, եւ սրբոյն Յովհաննու  
Կարապետին, եւ սրբոյն Ստեփաննոսի նա-  
խավկային, սրբոյն Գրիգորի մերոյ Լուսա-



ւորչին , եւ սրբոց Առաքելոց , Մարգարէից ,  
 եւ սրբոց Հայրապետաց , Մարտիրոսաց ,  
 Ճգնաւորաց , Կուսանաց , եւ ամենայն սրբոց  
 քոց՝ երկնաւորաց եւ երկրաւորաց , որոց  
 յիշատակն եւս օրհնութեամբ եղիցի ի մէջ  
 սուրբ Եկեղեցւոյս եւ առաջի սուրբ Պատա-  
 րագիս . Ամէն :

Յիշեա՛ , Տէր , զպաշտօնեայս քո՝  
 զԾնողսն մեր՝ զվարդապետս , զեղբարս ,  
 զընկերս , զկերակրիչս , զուխտաւորս , զճա-  
 նապարհորդս , զհանգուցիչս , զվաստակա-  
 ւորս , զխոստովանողս , զապաշխարողս ,  
 զգերիս , զհիւանդս , զնեղեալս , զիշխանս ,  
 զչարարարս , զբարերարս , զթշնամիս , զա-  
 տելիս , եւ որք պատուիրեցին մեզ հաւա-  
 տով . Յիշեա՛ , Տէր , և ողորմեա :

## Ա Ղ Օ Թ Ք

### ՅԵՏ ԳՈՀՈՒԹԵԱՆ

Յիշեա՛ , Տէր , եւ ողորմեա , եւ գթա՛  
 ի հոգիս հանգուցեալ ծառայից քոց , որք  
 ուղիղ դաւանութեամբ պաշտեցին զքեզ ,

եւ նովին հաւատով եւ յուսով ննջեցին ի քեզ : Յիշեա՛ զնոսա յաւուր մեծի գալստեան արքայութեան քո , արա՛ արժանի ողորմութեան , քաւութեան եւ թողութեան մեղաց . դասաւորեալ պայծառացո ընդ սուրբս քո յաջակողմեան դասուն , զի յաւերժական խնդութեամբ եւ մշտնջենական ցնծութեամբ փառաւորեսցեն զքեզ , Քրիստոս , ընդ Հօր եւ ընդ սրբոյ Հոգւոյդ , այժմ եւ միշտ եւ յաւիտեանս յաւիտենից . Ամէն :

### ԵՐԳԵԼՆ ԴՊՐԱՅ ԶՀԱՅՐ ՄԵՐ

Նշանակէ գեօթն բանս , զոր ասաց Փրկիչն մեր ի վերայ Խաչին :

### Ա Ղ Օ Թ Ք

#### ՅԵՏ ԶՈՅԳ ԱՍՈՒԹԵԱՆ ՀԱՅՐ ՄԵՐԻՆ

Տէր իմ Յիսուս Քրիստոս , որ ի վերայ Խաչին վասն փրկութեան իմոյ ծարաւեցար , եւ խաչահանուաց քոց աղօթեցեր . շնորհեա՛ մեղաւորիս զի փրկարար քոյով նպաստութեամբդ դառնայցեմ ի յախտից մեղաց իմոց , և ներելով իմոց պարտապանաց՝ քեզ ճշմարիտ հովուիդ իմում հետեւիցիմ :

## ԲԱՐՁՐԱՑՈՒՑԱՆԵԼՆ ՔԱՀԱՆԱՅԻՆ

### ԶԸՆԾԱՅՍՆ ԱՍԵԼՈՎ

#### «Ի Սրբութիւն Սրբոց»

Նշանակէ զաւանդումն հոգւոյն Տեառն մերոյ  
ի ձեռս չօր Աստուծոյ ի վերայ Խաչին :

### ԱՂՕԹ Ք

Զերեւեալդ ինձ ի փրկութիւն՝ խոստովանիմ ճշմարտապէս Մարմին եւ Արիւն Քրիստոսի Աստուծոյ՝ յուսոյ իմոյ, եւ աղաղակեմ առ քեզ՝ մեղայ յերկինս եւ առաջիքո . սրբեա զիս յամենայն պղծութենէ հոգւոյ եւ մարմնոյ . շնորհեա՛ ինձ ժամանակ եւ ցանկութիւն ապաշխարութեան . փրկեա զիս յերեւելի եւ յաներեւոյթ թշնամւոյ . տպաւորեա՛ զօգուտն հոգւոյ եւ մարմնոյ իմոյ : Պարգեւեա՛ ինձ բարեգործութեամբ եւ բարեպաշտութեամբ զքեզ արժանապէս ճաշակել, եւ փառաւորել զՀայր եւ զՈրդի եւ զՍուրբ Հոգիդ, այժմ եւ միշտ եւ յաւիտեանս յաւիտենից . Ամէն :

ԹԱՆԱԼՆ ՔԱՀԱՆԱՅԻՆ ԶՊԱՏՈՒԱԿԱՆ  
ՄԱՐՄԻՆ Ի ՅԱՆԱՊԱԿԱՆ ԱՐԵԱՆ

Նշանակէ զներկիւն Արեամբ Փրկչին մերոյ :

Ա Ղ Օ Թ Ք

Տէ՛ր իմ Յիսուս Քրիստոս, որ ըստ  
նախագուշակութեանն Եսայեայ Մարգա-  
րէին՝ հնձան հարեր՝ եւ զհանդերձ մարմնոյ  
քո ներկեալ արեամբ քով թաթաւեցեր .  
չնորհեա՛ մեղաւորիս, զի ճաշակմամբ նոցին  
մաքրիցիմ յամենայն աղտեղութեանց հո-  
գեկանաց, եւ իսկութեամբ սիրոյ ընդ քեզ՝  
մինչեւ ցկէտ կոչման իմոյ կապակցիցիմ  
հաստատապէս :



## ՈՂԲԵՐԳԱԿԱՆՔ

ՎԱՍՆ ՀԱՄԱՅՆ ԱԶԳԻ ԵՒ

ԵԿԵՂԵՑԱԿԱՆԱՑ ՀԱՅՈՑ

Եւ արդ Տէր իմ եւ Աստուած իմ Յիսուս Քրիստոս, ես ամենասխալ եւ բազում չարեօք եւ անօրէնութեամբ լցեալ ծառայսքո՞, արդէն յերկիր խոնարհեալ՝ կորագլուխ անձամբ եւ մեծակական ողբով ի խորոց սրտէ հառաչեմ առ ամենագթած Աստուածդ իմ, եւ աղաչեմ վասն ողորմելի եւ անտերունչ ազգիս մերոյ. աղաղակեմ առ քեզ՝ ո՛վ ողորմելեաց Ողորմած, անտիրացելոց Տէր, անճարելոց ճար, անօգնականից Օգնական, անյուսից Յոյս եւ Ապաւէն, նեղելոց եւ վշտացելոց հանգիստ եւ մխիթարութիւն: Գոչեմ առ քեզ մեծաւ թախանձանօք. բա՛ց, Տէր, զաչս քո, եւ տե՛ս զողորմելիութիւն մեր. տե՛ս զփոքրիկ հօտս քո, թէ ո՞րպէս եմք ցրուեալ եւ տարագրեցեալ ընդ ամենայն երկիր եւ մատնեալ ի ձեռս օտարաց տերանց եւ թշնամեաց, զրկեալ ի սեպհական բնակութեանց եւ ի հայրենեաց մերոց:



Զգթուքիւն ԲՈՒ, ՏԿՐ, առաքեա  
ի վերայ մեր եւ ամենայն  
Ժողովրդեանս:

Ո՛հ, զի եմք որպէս զնաւ ղեկարեկ,  
տատանեալք յալիս ծովու առանց ղեկա-  
վարի, եւ որպէս ոչխարք մուրրեալք ի  
յանապատի առանց հովուի. եւ ո՛չ ունիմք  
զՄովսէս՝ որ առաջնորդեսցէ. եւ ո՛չ ունիմք  
զՅեսու՝ որ ընդդէմ թշնամեաց կացցէ. եւ  
ո՛չ ունիմք զԴաւիթ՝ որ վասն մեր հաճու-  
յական պատարագս մատուցէ քեզ, եւ  
զսուր բարկութեան քո յետս դարձուցէ:  
Եւ ո՛չ ունիմք զՄարգարէ, զԹագաւոր եւ  
զԱռաջնորդ, եւ ոչ զօգնութիւն իմն յու-  
մեքէ:

Իշխանք մեր եւ ազատազնեայք մեր-  
կացեալք յիշխանութեանց եւ յընչից՝ եւ  
անկեալք ընդ իշխանութեամբ այլոց ծա-  
ռայեն թշուառութեամբ:

Հասարակ ժողովուրդքս գրաւեալք ի  
ներքոյ ծանր լծոյ եւ հարկի այլազանց՝  
հազիւ թէ հայթայթանօք գտանեմք զապ-  
րուստս կենաց մերոց. և զսերմանեալսն  
եւ զվաստակս մեր այլք ուտեն եւ վայե-  
լեն:

Եկեղեցիք վայելչագեղք եւ վանօրայք  
պայծառաչէնք՝ որք յանուն քո եւ ի յի-

Հատակ սրբոց քոց սիրելեաց կառուցան ,  
 Հոգւոյդ Սրբոյ օծմամբն կնքեցան , եւ ամե-  
 նայաղթ Սաչիդ նշանաւն պսակեցան , յորս  
 մատչիւր պատարագ Քառնդ Աստուծոյ ի  
 փրկութիւն աշխարհի , յորս կատարէին  
 սրբագործ եւ հոգեկեցոյց խորհուրդք քո ,  
 յորոց ելանէին եւ վերառաքէին առ քեզ  
 ձայնք օրհնութեանց և փառաբանութեանց ,  
 բուրմունք հոգեւորականք , նուէրք հաճու-  
 յականք եւ աղօթք հաշտարարք , ահա՛ ըստ  
 մեծի մասին ամայացեալք և ապականեալք՝  
 գողոց եւ գազանաց օթարան են եղեալք :

Յիրաւի ձգեաց թշնամին զձեռն ի ցան-  
 կալիսն քոյ : Մտին հեթանոսք ի ժառան-  
 գութիւնս քոյ եւ պղծեցին զսուրբ տաճարս  
 քո : Սրահք եւ սրբութիւնք նոցա դարձան  
 յապականութիւն : Սուգ առին ճանապարհք  
 նոցա : Հատան երթեկք տօնից տարեկանաց  
 նոցա : Լռեցին ի նոցանէ ձայնք օրհնու-  
 թեանց եւ փառաբանութեանց : Քաղանք  
 եւ յափշտակողք մուտ եւ ել առնեն ի նոսա :  
 Սքանչելարար դամբարանք եւ բժշկարար  
 նշխարք սրբոց՝ որք ի նոսա , կոխան եղեն  
 ոտից անսրբոց եւ պղծոց : Քահանայք եւ



պաշտօնեայք նոցա հալածեալք: Ուստի եղաք մեք մնացողքս նախատինք դրացեաց եւ այլն կատականաց թշնամեաց մերոց:

Արդ՝ այս ամենայն եկին եւ գան ի վերայ մեր վասն մեղաց մերոց: Քանզի մեք մեղաք, անօրինեցաք եւ ապստամբեցաք ի քէն. վասն այսորիկ եւ դու թոյլ ետուր այս ամենայն չարեաց գալ ի վերայ մեր եւ տիրել մեզ, եւ մատնել զմեզ ի ձեռս թշնամեաց՝ տերանց ապստամբողաց. որպէս ահա եմք տառապեալք ի վերայ ամենայն երկրի այսօր վասն մեղաց մերոց: Ուրեմն Աստուծոյդ մերում արդարութիւն, եւ ամօթ երեսաց մերոց:

Արդ՝ այժմ առ ո՛վ դիմեսցուք, ո՛վ Աստուած մեր, եւ ո՞ւմ պատմեսցուք զցաւս մեր. եթէ ոչ քեզ բարկացելոյդ. որ որպէս արդարութեամբ խրատեցեր եւ հարեր զմեզ, կարող ես և դու ողորմութեամբդ անդրէն վերստին բժշկել եւ մխիթարել:

Վասն որոյ՝ ահա անկանիմ առաջի անոխակալիդ Աստուծոյ եւ ըստ անառակին գոչեմ. մեղաք յերկինս եւ առաջի քոյ.

մեղաք ստեղծողիդ մերոյ. մեղաք բարե-  
րարիդ մերոյ եւ Աստուծոյ:

Աղաչեմ զքեզ, անոխակալ Տէր Աստ-  
ուած, դարձիր ի բարկութենէ քումմէ եւ  
անցո՛ ի մէնջ զցասումն քո. մի՛ յիշեր  
զմեղս մեր զառաջինս, վաղվաղեսցէ առ  
մեզ ողորմութիւն քո, զի աղքատացաք  
յոյժ: Զարթի՛ր, Տէր, զարթի՛ր. արի՛ եւ  
մի՛ մերժեր զմեզ իսպառ: Մի՛ մոռանար  
զաղքատութիւն եւ զնեղութիւնս մեր:  
Արի, Տէր, օգնեա՛ մեզ եւ փրկեա զմեզ  
վասն անուան քոյ, որ կոչեցեալ է ի վերայ  
մեր: Մի՛ մատներ զմեզ իսպառ վասն ան-  
ուան քոյ. մի՛ ցրեր զուխտս քո. եւ մի  
ի բացեայ առներ զողորմութիւնս քոյ ի  
մէնջ: Զի դու միայն ես Տէր մեր եւ թա-  
գաւոր. դու միայն ես Փրկիչ մեր եւ օգ-  
նական. դու միայն ես ապաւէն մեր եւ  
յոյս: Զի բաց ի քէն զայլ ո՞ք ո՛չ գիտեմք,  
եւ զանուն քո կարդամք հանապազ: Տե՛ս  
զտառապանս ազգիս մերոյ. հաս յօգնու-  
թիւն եւ այց արա:

Եւ որպէս գթայիր հնոյ ժողովրդեանն՝  
վասն Աբրահամու, Իսահակայ, Յակովբայ

եւ վասն Դաւթի ծառայից քոց . զթա՛ եւ  
այժմ նորոյ ժողովրդեանդ եւ փոքու հո-  
տիդ , վասն սրբուհւոյ Աստուածածնի՝ անա-  
րատ ծնողի քոյ , սրբոյն Յովհաննու Կա-  
րապետին եւ Մկրտչին քոյ . սրբոյն Ստե-  
փաննոսի նախավկային քոյ . սրբոց Առա-  
քելոցն եւ Մարգարէից քոց . եւ սրբոց  
Առաքելոցն եւ յատուկ Կուսաւորչացն մե-  
րոց՝ Թադէոսի եւ Բարդուղիմէոսի , եւ սրբ-  
բոյն Գրիգորի բազմաչարչար վկային քոյ .  
եւ նորին Որդւոց եւ Թոռանց՝ ընտրելոց  
ծառայից քոց . եւ սրբոց Հոիփսիմեանց եւ  
Քայիանեանց՝ յաղթող վկայիցն քոց : Եւ  
բարեխօսութեամբ սրբոց Հայրապետաց եւ  
Վարդապետաց , Ճգնաւորաց , Մարտիրո-  
սաց , Կուսանաց , եւ ամենայն սրբոց քոց  
հնոց եւ նորոց՝ յայտից եւ անյայտից :

Այլ եւ բարեխօսութեամբ սրբոց քոց  
երկնաւորացդ՝ Գաբրիէլի եւ Միքայէլի եւ  
ամենայն անմարմնական դասուցդ :

Ձի եթէ վասն բազում մեղաց մերոց  
եւ անօրէնութեանց առ ժամանակ մի թո-  
ղեր զմեզ , դարձուցեր զերեսս քո ի մէնջ  
եւ տրտմեցուցեր , վասն պատուական Ար-

եան քո՝ եւ վասն արդարութեան սիրելեաց  
 քոց՝ դարձ առ մեզ, եւ ողորմութեամբ  
 քով մեծաւ ողորմեաց մեզ, եւ ուրախաւ-  
 ցո զմեզ՝ որպէս ասացեր առ Եսայեաւ,  
 Լսեցո՛ր եւ մեզ զայն երանաւէտ ձայնն թէ՛  
 — Կուսաւորեաց եկեղեցիդ Հայաստանեայց  
 եւ ուրախ լեր, զի հասեալ է լոյս քո:  
 Ահաւասիկ ես դարձուցանեմ ի քեզ զխա-  
 ղաղութիւն իբրեւ զգետ, եւ զմանկունս  
 քո ի հեռաստանէ ի վերայ ուսոց իւրեանց  
 բարձեալ բերիցեն — : Յիրաւի՛ այդպիսի  
 ամենակարող Աստուծոյ ողորմութեան եմք  
 մնացեալ ապաստան, ողորմած Աստուած:

Ուրեմն հաշտեա՛ց ընդ մնացորդաց ժո-  
 ղովրդեան քոյ, փրկեա՛ զմեզ մեծաւ  
 սքանչելեօք, ժողովեա՛ զմեզ ի գոգ սիրոյդ  
 եւ մխիթարեա՛ ի փառս անուան քոյ սրբոյ,  
 որ կոչեցեալ է ի վերայ մեր:

Այլ և աղաչեմ զքեզ, Տէր իմ և Աստ-  
 ուած իմ, վասն ամայացելոց և անչքա-  
 ցելոց վանօրէից և եկեղեցեաց մերոց:  
 Կուր մեզ՝ ահա նեղեալ անձամբք աղա-  
 ղակեմք:

Մի՛ յիշեր զմեզս մեր, որով բարկա-

ցուցաք զքեզ . այլ յիշեա զսուրբսն քո՝  
յորոց անուն կառուցան եկեղեցիք մեր :  
Զսուրբ և զմաքուր նշխարս նոցա , որք  
ամփոփեալք են ի նոսա . և զսրբութիւնսն՝  
յորոց վերայ անուն քո կոչեցեալ է :

Եւ ոչ եթէ վասն արդարութեան իմոյ  
արկանեմ զայս աղերս առաջի քո , այլ  
վասն բազում գթութեան քոյ եւ վասն  
սիրոյ սիրելեաց սրբոց և սրբութեանց քոց :

Ուրեմն աղաչեմ զքեզ , ողորմած եւ  
գթած Աստուած , վասն անհուն ողորմու-  
թեան քոյ , ի սէր սրբոց եկեղեցեաց եւ  
սրբութեանց քոց , բարեխօսութեամբ քեզ  
հաճոյացելոց սրբոցն քոց , եւ միջնորդու-  
թեամբ նոցին չարչարանացն , պատուական  
արեանն , և մաքուր նշխարաց և դամբա-  
րանացն՝ ողորմեա՛ և այց արա : Որպէս  
տառապեցուցեր բարկութեամբդ , նմանա-  
պէս բժշկեա՛ եւ մխիթարեա՛ ողորմու-  
թեամբդ : Զի որպէս տեսին աչք մեր զա-  
մայութիւն և զապականութիւն նոցին վասն  
մեղաց մերոց , տո՛ւր մեզ տեսանել վե-  
րըստին զվերանորոգութիւն և զպայծա-  
ռութիւն նոցին վասն սիրելեաց սրբոց քոց :

Եւ որպէս հատան եւ լռեցին ձայնք  
 օրհնութեանց եւ փառաբանութեանցն ի  
 նոցանէ, արա զի վերստին զօրասցին եւ  
 բարձրասցին ի փառս անուան քոյ. զի ծա-  
 նիցեն ամենեքեան թէ՛ կոչեցեալ է անուն  
 քոյ ի վերայ մեր եւ նոցա: Զորս և մեր  
 տեսանելով վերառաքեսցուք փառս և գո-  
 հութիւնս ի յերկինս քեզ ընդ Հօր և ընդ  
 Սրբոյ Հոգւոյդ, այժմ և միշտ և յաւի-  
 տեանս յաւիտենից. Ամէն:





Եւ ընդ Բո անձն անցցե սուր:

**ԴԱՌՆԱԼՆ ՔԱՀԱՆԱՅԻՆ ԱՌ ԺՈՂՈՎՈՒՐԴՆ  
ԸՆԾԱՅԻԻ ԱՍԵԼՈՎ «Ի ՍՈՒՐԲ Ի ՍՈՒՐԲ»**

*Նշանակէ զհանգչիլն Բանին Աստուծոյ ի գիրկս Մօր  
իւրոյ յետ իջանելոյն ի Խաչէն :*

**Ա Ղ Օ Թ Ք**

**ԵՐԿՐՊԱԳՈՒԹԵԱՄԲ**

*Խոստովանիմ եւ հաւատամ, զի դա՛ է  
ճշմարիտ Մարմին եւ Արիւն Յիսուսի Քրիս-  
տոսի Որդւոյն Աստուծոյ, որ բառնայ զմեզս  
աշխարհի :*

**Ա Ղ Օ Թ Ք**

*Տէր իմ Յիսուս Քրիստոս, որ յիջանելն  
քո ի Խաչէն՝ հանգեար ի գիրկս Մարիա-  
մու՝ անարատի Մօր քո, եւ ցօղով կուսա-  
կան արտասուլաց նորին ոռոգանիլ հաճեցար  
չնորհեա՛ մեղաւորիս զի զսիրտ իմ մեղ-  
սամած՝ քեզ կենսատուիդ իմում օթե-  
լան եւ առագաստ պատրաստեցից, եւ  
անդադար զխոցուածս մարմնոյդ ողբալով  
համբուրեցից :*




ԱՐԿԱՆԵԼՆ ՔԱՀԱՆԱՅԻՆ ՉՄԻ ՄԱՍՆ  
ԿԵՆԱՐԱՐ ՄԱՐՄՆՈՅՆ Ի ԲԱԺԱԿՆ

Նշանակէ զիջումն չոգւոյն Տեառն մերոյ  
ի դժոխս առ նախահարս :

Ա Ղ Օ Թ Ք

Տէր իմ Յիսուս Քրիստոս , որ ըստ ան-  
ճառելի ողորմութեան քու՛մ իջեր ի դժոխս  
միաւորեալ Աստուածութեամբդ առ ի սփո-  
փել եւ վերածել զնախահարս . շնորհեա՛  
մեղաւորիս , զի ի մէջ դժոխոց մեղաց իմոց  
արժանի լինիցիմ այցելութեանդ , և օգնու-  
թեամբ քով յառնիցեմ ի մեռելոտի գործոց  
իմոց . Ամէն :





Պատեաց զնա պատսառակալա  
եւ եղ ի կռածոյ գերեզմանի:

## ՃԱՇԱԿԵԼՆ ՔԱՀԱՆԱՅԻՆ ԶՍՐԲԱՐԱՐ ՄԱՐՄԻՆ ԵՒ ԶԱՐԻՒՆ ՏԵԱՌՆ ՄԵՐՈՅ

Նշանակէ զթաղումն Տեառն մերոյ երեքօրեայ  
ի գերեզմանի:

### Ա Ղ Օ Թ Ք

Երբ ասի «Քրիստոս պատարագեալ»

Միաժին Որդի Աստուծոյ եւ Բան Հօր,  
արարիչ երկնաւորաց եւ երկրաւորաց եւ  
լցուցիչ համայն արարածոց, որ լնուս զա-  
մենայն յամենայնի, անպարագրելի գոլով  
բնութեամբ՝ բովանդակեցար ի մարմնի, զի  
տեսանելի եւ շօշափելի լիցիս մարդկային  
ազգի, վասն որոյ ճաշակելի եւ կերակուր  
եղեր ամենայն հաւատացելոց, զի տացես  
զկեանս յաւիտենականս այնօցիկ՝ որք հա-  
ւատով եւ սրբութեամբ մերձենան ի քեզ՝  
ըստ անսուտ խոստման քո, մարդասէր: Եւ  
այժմ մեք փրկեալքս պատուական արեամբ  
քո՝ հաւատով տեսանեմք զՓրկիչդ մեր բու-  
լորապէս պարունակեալ ի ներքոյ կրկին  
տեսակաց՝ հացին եւ գինւոյն, հոգւով,  
մարմնով եւ Աստուածութեամբ. յաղագս

որոյ երկրպագութիւն մատուցանեմք փրկողիդ մերում, եւ աղաչեմք զանբաւ գթութիւն քո: Լո՛յժ զկապ մեղաց մերոց, եւ ջնջեա՛ զձեռագիր մերոյ անօրէնութեան, բեւեռեա զմեզ յերկիւղ եւ ի սէր քո սուրբ, զի միշտ գնասցուք արժանի կոչմանն՝ յոր կոչեցեր զմեզ: Տուր մեզ, Տէր, բանաւոր հօտի քո յամենայն սրտէ հետեւել միայն զկնի ճշմարիտ հովուիդ եւ կատարել զկամս քո, եւ լսել զերանաւէտ բարբառ քո. աճել օր ըստ օրէ, և պահել զպատուիրանս քո զօրհանապազ: Պարգեւեա՛ մեզ զսիրտ սուրբ եւ զհոգի խօնարհ, զի մի՛ արհամարհեալ լիցուք առաջի քո. մաքրեա՛ զմիտս եւ զխորհուրդս մեր, որպէս սրբոց քոց Առաքելոցն, զի ընդ նոսին արժանի լիցուք զսուրբ եւ զսրբարար, զկենդանի եւ զկենդանարար Մարմին եւ Արիւն քո՝ Քրիստոս Աստուած մեր, ճաշակել եւ ընդունիլ յուսով կենացն յաւիտենից ընդ ամենայն սուրբս քո, այժմ եւ միշտ եւ յաւիտեանս յաւիտենից. Ամէն:

---

## ԱՂԵՐՍԱՆՔ

ՎԱՍՆ ԽԱԶԻ ԵՒ ՉԱՐՉԱՐԱՆԱՑ ՓՐԿՉԻՆ

ԳՐԻԳՈՐԻ ՆԱՐԵԿԱՑԻՈՅ — ԲԱՆ Դ.

Բարեբանեալ Աստուած երկնաւոր,  
միա՛յն արարիչ, Տէ՛ր ամենակալ, մեծու-  
թի՛ւն անեղ, գթութի՛ւն օրհնաբանելի  
ողորմութի՛ւն խոստովանելի, բարերարու-  
թի՛ւն երկրպագելի, խնամակալութի՛ւն  
պաշտելի, մարդասիրութի՛ւն տօնելի, պահ-  
պանութի՛ւն խնկելի, բարձրեա՛լ անքնին,  
մերձաւո՛ր կամարար. ապաւէ՛ն անկասկա-  
ծելի, մխիթա՛ր սրտից, փարատի՛չ վշտաց,  
ապաքինի՛չ ցաւոց, սպառո՛ւմն վհատու-  
թեանց, բարձո՛ւմն պարտեաց, փոխարկի՛չ  
կարեաց, կարգաւորի՛չ կրից, յարմարի՛չ  
բանից, սանձարկո՛ւ լեզուի, շրջադրութի՛ւն  
շնչոյ, կացուցի՛չ հագագի, ամփոփի՛չ խոր-  
հրդոց, կրթարան կամաց, արձանացուցի՛չ  
յուզմանց, հանդարտութի՛ւն մրրկաց, խա-  
ղաղութի՛ւն ծփանաց, որ ունիս զթեւոց  
ամենընթաց իշխանականիս, եւ իմաստու-  
թեամբ նուաճեալ առ քեզ դարձուցանես:

Գոհարանեալ մի՛շտ երախտաւոր, որ  
հեզութեամբ անհպարտութեան երկայնա-  
մըտեալ՝ հանգչիս տենչանօք, անճառ հրա-



շիւք յանձինս սրբոց: Թագաւոր էի՛ց հա-  
մայնից՝ ամենայնիւ ծանուցեալ գթած-  
սկզբնահա՛յր եւ նախաշաւիղ՝ սիրոյն ըն-

Թացից . ճանապարհ կենաց , որ առաջնորդես քաղցրութեամբ՝ դիմելոյս ի լոյսդ վերին : Ձեռնկալու մե՛ծ վստահութեան , որ ո՛չ թողացուցանես գայթակղեցելոյս ի վայր կործանիլ . յուսո՛յ կերպարան ճշմարիտ , առհաւատչէիւ աղաչողաց մատանց՝ յայտնի երեւեալ . ապաւինութի՛ւն հանգստեան՝ որ ո՛չ երբեք մատնես՝ վտանգի դատապարտութեան : Ազատութի՛ւն շնորհածիր , որ տաս լիապէս՝ առանց փոխատրութեան փրկանաց . առատութի՛ւն աննախանձելի , որ քոյին փառաւորութեամբդ՝ զանարգնիւթ հողոյս , ճոխացուցանես : Պայծառութի՛ւն անըստուեր , որ ճառագայթիւք անեղբարձրութեան պարածածկեալ զթշուառս՝ կրկին բարգաւաճ առնես : Քաւի՛չ մեղանաց բազմաց , որ զհերքեալս ի փրկութենէ՝ առաջնովն պայծառութեամբ նորոգեալ վերըստին վայելչացուցանես : Հնարաւո՛ր դիւրահաս՝ առ ամենայն անբաւ գերամբարձութիւն յաւէտ յառաջեալ , ե՛լք վրստահութեան՝ առ խոստացելոցն վայելս . երանութի՛ւն անձկալի , յոր զկենդանութիւն շնչոյս լքանել է ախորժելի՝ զի զքեզ

գտից, կենդանի՛ : կա՛մք անփոխադրելի, առ ի քաւութիւն գերւոյս զօրացեալ ամենագովելի. անսխալելի դե՛ղ կենաց, որ եւ մեռելոց բնաւին եղծելոց՝ առնես զսքանչելիս : Ամենաստե՛ղծ աներկբայելի, որ զհուրբ կիզեալն, եւ զհողմով հոսեալն, եւ զժանեօք գազանաց ծախեալն ի քթթելական նովին հիւթականութեամբ անպակաս յարուցանես : Անհաւասա՛ր համարձակութիւն, յորում Աստուածօրէն պանծանօք պարծիլն է իրաւացի :

Հայեա՛ց, Տէր, յերկնից զուարթ քաղցրութեամբ՝ յամենակործան վտանգ նեղելոյս, եւ արա՛ անդորր հանգստական դիւրաւոր՝ ի բազմատագնապս հեծութենէ : Եւ զյարուցեալ զումարս սատակչացն, եթէ՛ սպառազէնք այսական դժնեայ հնարաւորութեան՝ բուռն մարտակցաց, պատկանեալ զինուք, եթէ՛ մեղաց տգեղ՝ եւ քոատելի կերպարանք, եթէ՛ ցաւոց եւ ախտից՝ վատնիչ եւ կորստական նշմարանք, մերժեսցես, հանցես, հատցես, խափանեսցես, եւ հալածեսցես՝ հեռի սահմանաւ իսպառ տարագրեալ, անդարձ որոշմամբ



վերստին կորստեանն . եւ կառուսցե՛ս , կա-  
 ցուսցե՛ս նպատակ կենաց եւ ամուր մա-  
 հարձան զնշան Սաչիդ՝ ապաւինելոյս ի քեզ  
 փրկութիւն : Եւ յայսմ անպարտ անպատիր  
 եւ անվանելի արուեստից՝ ահաւորիդ մե-  
 ծութեան , լուծցին որոգայթքն գաղտնա-  
 ծածուկ , սատանայականք , կապտեսցին  
 մեքենայքն , վատնեսցին գայթակղու-  
 թիւնքն , խայտառակեսցին հաղբիցն դրու-  
 թիւնք , յայտնեսցին երեւոյթք որսոյն ,  
 գտցին նենգողին ծուղակք , վերասցին  
 վարմին վերարկուք , տոչորեսցին որոմանցն  
 բոյսք , նզովեսցին բռնաւորին չարաբանու-  
 թիւնք , կտրեսցի լար խաբէութեան ի մահ  
 որսողին , պարսեսցին պատրողին բանսար-  
 կութիւնք , պակասեսցին զէնք զրպարտո-  
 ղին , անկցին սուսերք մահաբերին , սուզես-  
 ցին սաղրողին պատրաստութիւնք , արձա-  
 կեսցին տոռունք տազնապողին : Այլայլես-  
 ցին սուտ կերպարանք կեղծաւորին , սա-  
 տակեսցին խրոխտականացն խիստ յարձակ-  
 մունք , ցրուեսցին կցորդութիւնք կերչացն ,  
 բաժանեսցին ազինք աւազակացն , քայքա-  
 յեսցին բոյլք բարբարոսացն , քանդեսցին

ամբողջ ապստամբողացն, արգելցին ամպ-  
րոպք յանդգնելոցն, փարատեսցին փորձո-  
ղին անձրեւք, հալեսցի եւ ցամաքեսցի  
եղեամն աղանդաւորին: Խորտակեսցի եղ-  
ջիւր գոռոզին, մանրեսցին ամբառնալիք  
դրօշիցն կերպարանաց, փշրեսցին ամբար-  
հաւաճութիւնք հպարտացելոցն, նահան-  
ջեսցին դիմեցմունք ճակատելոցն, քակ-  
տեսցին միաբանութիւնք զօրացն Բելիարայ՝  
թէ՛ անմարմինք եւ թէ՛ մարմնաւորք, փա-  
խիցեն ընդ նոյն ճանապարհ ի մի շաւղաց  
հետոց, յեօթն տարակոյս. ի գուրն ինձ  
փորեալ՝ ինքեանք ընկճեսցին: Յեղանա-  
կեսցին ձմերունք ձանձրացուցչին, հատցի  
կապն՝ կցորդութեան մշտաջան աւազակին,  
նողկասցի մտացս կայից՝ համբոյր շողո-  
քորթին, ընդմիջեալ մեկնեսցին՝ նետաձգու-  
թիւնք նեղչին, կացցէ ի սասանման՝ նաւ  
խարդախողին, խլեսցին յարմատոց անտի՝  
ատամունք խածանողին:

Վասն փայտիդ օրհնութեան կենաց՝  
յորում պրկեցար Աստուածդ անըմբռնելի,  
յիշատակաւ բեւեռացդ՝ որով ի գործի մա-  
հուն մածուցար արարիչդ երկնի եւ երկրի,

արեամբդ տէրունականաւ՝ որով զվիշապն մեծ կարթիւ ածեալ որսացար, լեզւոյն դառնութեամբ զոր արբեր, որով զդեղատուութիւն կորուսչին արտաքս հեղեր, պատմարանութեամբ ըղձական ճառից կրիցն սարսափելեաց՝ որով զլրբութիւն հակառակողին ըմբերանեալ ամաչեցուցեր, անուամբդ անհասականաւ ամենայնիւ անթարգմանելւոյդ՝ յորմէ դողան եւ դատապարտին սոսկացեալ սաստիկ սարսափմամբ բնութիւնք ամենայն երեւութից եւ աներեւութից. եղիցին այս ամենայն պարզեւք շնորհաց՝ խոստովանելոյս ի պաշտպանութիւն, ի բժշկութիւն եւ ի քաւութիւն: Եւ մահաբեր դառնաթոյն օձին, եւ որ ի նմա ազդեաց տիեզերադաւ չարութիւնն՝ ի սատակումն եղիցի նորին. նոյն ինքն ի կորուստ, և յանբժշկական հարուած տանջանացն՝ սովաւ մատնեսցի, կապեսցի եւ ըմբռնեսցի: Եղիցի՝ ողորմութիւն ստեղծողիդ ընդ իս, եւ շունչ ոգւոյս իմ ընդ քեզ անբաժանօրէն կապաւ միացեալ ի մի:

Եւ որ ոք ընթերցցի զայս աղերս ձայնի մաղթանաց՝ գոչման աղօթից, հայցման

ծերոյ եւ տղայոյ, կուսի եւ երիտասարդի,  
 եւ եթէ յաղախնեաց ոք պաղատեսցի աստ-  
 ուածսիրաբար, հաւասարապէս անաչառու-  
 թեամբ ընկալցին ի քէն մասն երանութեան՝  
 պարտուց ազատութեան, հաստեալ վերըս-  
 տին յանարատութիւն նորոգ մաքրութեան,  
 նկարեալ դարձեալ զքոյդ կերպարան ան-  
 փոփոխելի: Ահա՛ տիրապէս հնարաւոր,  
 զօրեղ, անպատում, անհաս, անիմանալի,  
 տեսցե՛ս աստանօր ի հառաչանս կողկողա-  
 նաց այսր հեծութեան, որ ի բոլորից շըր-  
 թանց ընծայեալ քեզ մատուցանի, վասն  
 Հօր քո երկնաւորի եւ բարերարի, եւ Հոգ-  
 ւոյդ Սրբոյ՝ փառակցի եւ կենդանատուի.  
 Աստուածածնիդ բարեխօսութեամբ եւ խըն-  
 դըրուածովք ամենայն սրբոց: Զի դու  
 ստեղծեր զամենայն, եւ ի քէն եղեն ամե-  
 նայնք, եւ դու տիրես ամենայնի. եւ քեզ  
 փա՛ռք յամենեցունց, մի՛նդ յիսկութենէ՝  
 անժամանակ երրորդութեանդ՝ զուգակցա-  
 պէս փառաւորեալ յանբաւս, եւ յաւիտե-  
 նից յաւիտեանս. Ամէն:

---

## ԵՐԳԵԼՆ ԴՊՐԱՑ ԶՏԱՂՍ

Նշանակէ գիտնդութիւն եւ գիրճուումն աշակերտաց  
վասն Յարութեան Տեառն մերոյ:

### Ա Ղ Օ Թ Ք

Տէ՛ր իմ Յիսուս Քրիստոս, որ քոյով  
փառաւոր յարութեամբդ զհաւատացեալս  
քոյ բերկրեցուցեր. շնորհեա՛ մեղաւորիս՝  
զի ի յարութեան յաւուրն յետնում արժանի  
լինիցիմ բերկրիլ եւ ուրախանալ ընդ պարս  
երջանկաց եւ երանելեաց յարքայութեան  
քում. Ամէն:





Յարեալ Աստուած եւ ցրուեցան  
ամենայն թշնամիք նորա :

ԳԱՌՆԱԼՆ ՔԱՀԱՆԱՅԻՆ ԸՆԾԱՅԻՒՆ  
ԱՌ ԺՈՂՈՎՈՒՐԴՆ ԱՍԵԼՈՎ «ԿԵՑՈ՛ՏԷՐ»  
Նշանակէ զերեւիլն Տեառն մերոյ յետ Յարութեան  
իւրոյ:

### ԳՈՀՈՒԹԻՒՆ

Աստուա՛ծ մեր, և տէ՛ր մեր երևեցաւ  
մեզ, օրհնեալ եկեալ անուամբ Տեառն:

### ԱՂՕԹՔ

Երբ ասի «Լցաք»

Գոհանամ զքէն՝ Հա՛յր ամենակալ, Որ-  
դիդ միածին, և Հոգիդ ճշմարիտ, որ ընտ-  
րեցեր զհաւատացեալս անուանդ քում  
սրբոյ ի մասն վիճակի սրբոցն ի լոյս. եւ  
ստացար քեզ ժողովուրդ սեպհական, և ա-  
րարեր հաղորդ փառաց Աստուածութեանդ,  
եւ ժառանգորդ անճառ բարութեանց քոց.  
ո՛չ ըստ մերում արժանաւորութեան, այլ  
ըստ անբաւ գթութեան քո, որ միշտ շնոր-  
հես առատապէս եւ ոչ նախատես. փոքր  
պահանջես, և մեծամեծս պարգեւես: Այո՛  
օրհնելով օրհնեմք և գոհանալով գոհանամք



Համբարձաւ Ասուլած օրհնութեամբ  
եւ Տէր մեր ձայնիւ փողոյ:



զքէն, Տէ՛ր Աստուած մեր, որ յայսմ մա-  
սին զմեզ արժանաւորս կացուցեր: Աղա-  
չեմք զքեզ, մի՛ թողուր զմեզ ի ձեռաց  
քոց յայսմհետէ մինչեւ յաւիտեան. եւ ե-  
կեսցէ ողորմութիւն քո ի վերայ մեր զա-  
մենայն աւուրս կենաց մերոց, եւ եղիցի  
անուն քո օրհնեալ յաւիտեան եւ յաւիտ-  
եանս յաւիտենից: Ամէն:

## ԱՍԵԼՆ ՔԱՀԱՆԱՅԻՆ

### «Օրհնեալք եղերուք»

Նշանակէ զօրհնութիւն Տեառն մերոյ զոր ետ հա-  
ւատացելոց իւրոց ի համբառնալն յերկինս:

## ԱՂՕԹՔ

Տէր իմ Յիսուս Քրիստոս, որ ի համբառ-  
նալն քո առ ի յերկինս օրհնեցեր զհաւատաց-  
եալս քո՝ խոստանալով նոցա զմխիթարիչ  
Սուրբ Հոգին. շնորհեա՛ մեղաւորիս զի  
յամենայն խորհուրդս, ի բանս եւ ի գործս  
իմ օրհնութեան քում Աստուածայնոյ եւ  
շնորհաց Հոգւոյդ Սրբոյ արժանի լինիցիմ:  
Ամէն:

## Ա Ղ Օ Թ Ք

## ՅԵՏ ԱԻԱՐՏՄԱՆ ՊԱՏԱՐԱԳԻ

Սկիզբն եւ կատարումն ամենայնի Աստուած, որ ամենայն բարի ի քէն սկսանի և քեւ կատարի, եւ ի քեզ բովանդակի ամենայն, ի վախճան աղօթիցս ողորմեա՛ մեզ, և լեր ընդ մեզ զամենայն աւուրս կենաց մերոց. և եղիցի՛ ամենազօր աջ քո պահապան մեզ յամենայն ժամ ի տուէ և ի գիշերի, ի ննջել և ի յառնել եւ զամենայն գործս մեր ի բարին կատարեա՛. Ամէն:

## Ի ՀԱՄԲՈՒՐԵԼՆ ԶԱԶ ՊԱՏԱՐԱԳՉԻՆ

## Ե Ր Գ

Յիշեսցէ՛ Տէր զամենայն պատարագս քո, և զուխտս քո ընդունելի արասցէ:

## Ա Ղ Օ Թ Ք

## Ի ՍԿՍԱՆԻԼ ԳՈՐԾՈՑ

Զգործս ձեռաց մերոց ուղիղ արա ի մեզ, Տէ՛ր, և զգործս ձեռաց մերոց յաջողեա մեզ:

## Հ Ա Ռ Ա Չ Ա Ն Ք

ՆԱԽ ՔԱՆ ԶԵՈՍՏՈՎԱՆՈՒԹԻՒՆ

ԳՐԻԳՈՐԻ ՆԱՐԵԿԱՑԻՈՅ — ԲԱՆ ԻԼ.

Եւ քանզի ըստ ողբաձայնիցն բանաստեղծութեանց վերընծայելոց՝ զգրութիւն թուոցս յարմարեցի կական եւ հեծութիւն, հառաչանք կողկողազինք, դառնութեան լալումն եւ արտասուաց երգք. դարձեալ սկսայց զճառ պաղատանացս խոստովանօրէն զղջականաբար, զգաղտնածածուկսն յայտնաբարբառ, զի անդրադարձութեամբ սկզբմանցն եւ վերջնաւորօքն բառիւք, զնոյն համաձեւութիւն ի մի թախանձ նմին մաղթանաց հոգեկեցոյցն խոնարհութեան՝ աստանօր եղից:

Մեղայ մեծիդ բարերարութեան՝ անարգըս մեղայ. մեղայ ծագմանդ ճառագայթից՝ խաւարս մեղայ, մեղայ շնորհացդ անբաւ երախտեաց՝ արդարեւ մեղայ. մեղայ սիրոյդ վերնում գթութեան՝ յայտնապէս մեղայ. մեղայ ստացողիդ յօչէութենէ՝ ստուգապէս մեղայ. մեղայ գերունակ գոգոյդ գրկանաց՝ անբաւս մեղայ. մեղայ

աննուազ լուսոյդ վայելման՝ նենգողս մեղայ. մեղայ ճաշակման անճառդ կենաց՝ բազումս մեղայ. մեղայ անհաս պարզեւեացդ ձրից՝ հանապազ մեղայ. մեղայ գովեալ մարմնոյդ Աստուծոյ՝ մահու չափ մեղայ. մեղայ պաշտելի արեան Արարչիդ՝ իսկապէս մեղայ:

Ահա՛ արդարեւ օրհնեալ է հատուած բանի յուսադրական սրտի այսր մեղայի. սոյն սա՛ պատուելի աւանդ, անմոռաց պատուէր, հայրենեացն տուր, նախահարցն օրէն, համայնից թոշակ, անհերքելի բան, զօրաւոր պատասխանի, կենդանութեան կամուրջ, ախորժելի վերնոյն, սիրելի սըրբոց, անխզելի կապ, հրաշալի բարբառ, անշրջելի պատճառ, բաղձալի աղերս, փափաքելի սեղան, սրտաբեկ հնչումն, անհնարից ճարակ, կարծրութեան վանիչ, աստուածապաշտից սահման, հեթանոսաց դիրք, վաղնջուց կանոն, քրիստանէից հարազատ, արարչութեանն յաղթող, անջրպետ հզօր, խտրոց ահաւոր, արուեստ բարձրութեան, խորութիւն անչափ, հիացման տեսիլ, խորհուրդ կնքեալ. ընդ որ չիք ումեք անցա-

նել՝ եթէ ոք անըմբռնելի մտաց արագման  
 զսա ծանիցէ: Չայն բարեպատեհ հրաշա-  
 ւորական, որ ո՛չ յիշատակեցաւ ի վերջին  
 դատակնիք դասուն լքելոյ. գուցէ առ նմին  
 խզեալ համառօտ զվրիժակն իրաւանց մա-  
 հուն հասելոյ, յորմէ ընտրութիւնն ապա-  
 գործ եղեալ՝ զսահմանն՝ յաւիտենական  
 քակտեսցէ: Չարդ փառացն՝ մեծութեան,  
 որով նոյն ինքն Աստուածութիւնն պսակ-  
 եալ բարգաւաճի: Քանզի ո՞վ ոք դիմեալ  
 կալաւ զեղջերաց սեղանոյ այսր սրբու-  
 թեան, եւ ոչ առ ժամայն պրծեալ ի պատ-  
 ժոց անարաա գտաւ: Իսկ եթէ Աքար զարմ-  
 եան եւ Սաւուղ կիսեան, եւ Յուդա սի-  
 մոնեան՝ ասելով զսոյն ոչ արդարացան,  
 եւ ես վկայեմ իրաւամբք՝ խոստովանեալ  
 զայս պայման բանի, զի յակամայիցն բըռ-  
 նադատելոց ո՛չ է կատարեալ սէր. ուստի  
 եւ ո՛չ բովանդակապէս փրկութիւն: Իսկ  
 ես կամաւ համբուրեմ՝ դարձեալ կրկնելով  
 զերջանիկ բանիդ զմկրտութեան հարազատս:

Մեղա՛յ երախտեացդ մոռացութեան՝  
 վերստին մեղայ. մեղայ մարմնոյ ձեռն յոգի  
 հարեալ՝ յիմարս մեղայ մեղայ առ կեանսդ

դրժողութեան՝ իսկ եւ իսկ մեղայ . մեղայ  
բանիդ ապախտ առնելոյ՝ չարաչար մեղայ .  
մեղայ ի յօր սատակման ինձէն ստիպեալ՝  
վատթարս մեղայ . մեղայ պարտականս  
անկենդան մահուն՝ ձաղելիս մեղայ . մեղայ  
անպատկառս քո բարձրութեան՝ տաղտկա-  
լիս մեղայ : Վերջին ինձ կրկին աշխարհ  
հոգեւոր՝ զի ի կորուստ եւ ի կործանումն  
ինձ երեւեցայ . զի անդարձս վարատեցայ ,  
զի որդիս թշնամի գրեցայ , զի ի բարձանցն  
երկնից ընկեցայ , զի փուշս վարուց դիզե-  
ցի : Եւ եւս առ սմին ողբք աղաղակի , զի  
անձամբ զանձն անարգեցի , զի բազին կո-  
րուսչին գտայ :

Այլ իմն կսկիծ դժնդակ սրտի , զի զիս  
ունին առ որ չեմ , զարտաքնայարդար բա-  
ժակս անմաքուր , զբռեալ որմս գարշունակ ,  
զսին պարծանօք պաճուճեալս , զլոյսս ի  
մռայլ շրջեալ , զգերանակիր ակնս՝ թշուա-  
ռացեալ , զջահս փառաց՝ շիջեալ , զամե-  
նայնիւս յամենայնի ամենայն իրօք վնա-  
սակարս , առ տնօրինականսն տէրունականս ,  
առ յայտնութիւնս աստուածայինս , առ  
երեւմունս արարչագիրս , առ խոնարհու-

Թիւնսն սարսափելիս, առ այն զոր տեսի  
 աչօք իսկ իմովք, առ որ մեծ է պատաս-  
 խանատուութիւնս քան առ համօրէն Աւե-  
 տարանն. զարմանս, հիացմունս, հոգս հա-  
 լողականս, անդամունս անհնարաւոր,  
 թուականութիւնս մտաց անբարդելիս, ել-  
 մունս անկատարս, իջմունս անհաստատս,  
 յուսահատութիւնս յարմարականս, յանդի-  
 մանութիւնս պատշաճականս, ձաղանս պա-  
 տեհագոյնս, նզովս իրաւացիս, անէծս ար-  
 ժանահատոյցս: Արդ՝ այսոքիկ են մեղա-  
 ւորիս իմ կշտամբութիւնք, եւ ինքնահար-  
 ուած տանջանաւորութիւնք:

Եւ քանզի կարող ես զայս ամենայն  
 զպարտս թողուլ, եւ զխայթուածս մահու  
 բժշկել, Տէ՛ր ողորմութեանց, Աստուած  
 բոլորից, Քրիստոս թագաւոր բարձրեա՛լ Հօր  
 Որդի, ստեղծի՛չ, գթա՛ծ, բարերա՛ր, օրհ-  
 նեա՛լ, առա՛տ, հարո՛ւստ, հզօ՛ր, ողոր-  
 մա՛ծ, տեսո՛ւչ, ձեռնկա՛լ, հաստի՛չ, ապ-  
 րեցուցի՛չ, դարմանի՛չ, կեցուցի՛չ, եր-  
 կայնամի՛տ, անոխակա՛լ, ապաւէ՛ն, բժի՛շկ,  
 գովեա՛լ, երկնաւո՛ր, անճա՛ռ, լո՛յս,

կեանք, յարութիւն, նորոգութիւն, քա-  
լութիւն:

Եթէ՛ հայեսցիս մարդասիրութեամբ,  
ըստ որում քոյդ են սովորութիւնք, նայեց-  
եալ ի քեզ կողկողիմ եւ ես. եթէ՛ լուի-  
ցես՝ հառաչեմ. եթէ՛ ունկն մատուցանի-  
ցես՝ պաղատիմ. եթէ՛ անսայցես՝ աղեր-  
սեմ. եթէ՛ ներեսցես՝ աղաչեմ. եթէ՛ առ  
իս դառնայցես՝ գոչեմ: Ապա եթէ՛ անտես  
առնիցես՝ կործանիմ. իսկ եթէ՛ առ ոտն  
հարկանիցես՝ լամ. եթէ՛ զոգեպահն ոչ ըն-  
ծայեսցես՝ մեռանիմ. ապա եթէ՛ ահարկու  
դէմս ցուցանիցես՝ սատակիմ. իսկ եթէ՛  
սաստեսցես՝ դողամ. եթէ՛ խեթիւ տեսա-  
նես՝ սոսկամ. ապա եթէ՛ սաստկանաս՝ սար-  
սափեմ. եթէ՛ հալածես՝ հեծեմ. իսկ եթէ՛  
ընդ վայր հարկանիցես՝ հերքիմ. եթէ՛ զող-  
բոց վհատութիւնս ոչ առցես՝ տագնապիմ.  
Եթէ՛ խստանաս՝ փախնում. ապա եթէ՛  
սպառնաս՝ ընկճիմ: Իսկ եթէ՛ քննես՝ քար-  
կոծիմ. ապա եթէ՛ ուժգինս ակնարկես՝  
սուղանիմ. եթէ՛ ո՛չ անխայեսցես՝ մերժիմ.  
Եթէ՛ կոչեսցես՝ խիթամ. իսկ եթէ՛ աչս  
յառեսցես՝ ամաչեմ. եթէ՛ ձայն տացես՝



երկնչիմ: Ջբարեացն պարգեւ մատնեալ,  
 զերանութիւնն թողեալ, զչնորհն լքեալ,  
 զուխտն ցրեալ, զաւանդն կենաց մոռաց-  
 եալ, զհամարձակութեանն վստահութիւն  
 կորուսեալ, զստեղծիչդ էիցս բարկացուց-  
 եալ, զանճառութիւն շնորհին ընդ ոտնեալ,  
 զպատուոյն պատկեր այլայլեալ:

Իսկ եթէ առ այս խեղդ մահու հեծու-  
 թեան ցաւոցս մարդասիրեալ՝ առ իս ժա-  
 մանեցուսցես, Տէ՛ր Յիսուս Քրիստոս,  
 զազդեալն գիր լնանիլ ի յիս, եթէ բժշկու-  
 թիւն դադարեցուցանէ զմեղս մեծամեծս,  
 որով ամենառատ քաղցրութեամբ քով  
 պատուաստեալ ի քեզ, զքոյդ կերպարան  
 լուսոյ լցեալ եւ նկարեալ յոգի՝ վերստին  
 գտեալ պնդեցայց քաւեալ, եւ ստեղծեալ  
 կրկին ի փրկութիւն անմահից կենացն  
 անախտականաց. եւ քեզ ընդ Հօր Հոգ-  
 ւովդ Սրբով փառք յաւիտեանս. Ամէն:



## ԶՂՁՈՒՄՆ

Մեղայ Ամենասուրբ Երրորդութեանն՝  
 Հօր և Որդւոյ և Հոգւոյն Սրբոյ: Մեղու-  
 ցեալ եմ Աստուծոյ, խոստովանիմ առաջի  
 Աստուծոյ՝ և Սրբուհւոյ Աստուածածնին,  
 եւ առաջի քո Հայր սուրբ՝ զամենայն մեղս  
 զոր գործեալ եմ: Քանզի մեղայ՝ խորհրդ-  
 դով, բանիւ և գործով. կամայ և ակամայ,  
 գիտութեամբ եւ անգիտութեամբ. մեղայ  
 Աստուծոյ:

Մեղայ հոգւովս և զօրութեամբ սորա,  
 մտօքս և շարժմամբ սորա. մարմնովս եւ  
 զգայութեամբ սորա: Մեղայ զօրութեամբ  
 հոգւոյս. խորամանկութեամբ, անզգամու-  
 թեամբ, յանդգնութեամբ եւ երկչոտու-  
 թեամբ, շռայլութեամբ և ժլատութեամբ,  
 զեղխութեամբ և անիրաւութեամբ, չարա-  
 հաւանութեամբ, յուսահատութեամբ, եւ  
 թերամտութեամբ. մեղայ Աստուծոյ:

Մեղայ չար խորհուրդով մտացս, նեն-  
 գութեամբ, ատելութեամբ, խեթիւ, մախա-  
 նօք, յաչաղանօք, թուլութեամբ, պոռնկա-  
 կան խորհրդով, արուական, իգական, ա-

նասնական, գազանական. ի գիշերի և ի տունջեան՝ երազական գիճութեամբ, և անըջական գարշ աղտեղութեամբ. մեղայ Աստուծոյ:

Մեղայ ցանկութեամբ մարմնոյս, հեշտութեամբ, պղերգութեամբ, յօրանջմամբ քնոյ, շարժութեամբ մարմնոյս, եւ զազրագործութեամբ ի պէսպէս ախտս. հեշտալրութեամբ լսելեացս, արատութեամբ աչացս, ցանկութեամբ սրտիս, պագչոտութեամբ, անժուժկալութեամբ, շուայտութեամբ, և արբեցութեամբ. մեղայ Աստուծոյ:

Մեղայ չարաբանութեամբ լեզուիս. ստախօսութեամբ, սուտ երդմամբ, երդըմնազանցութեամբ, հակառակութեամբ, վիճարանութեամբ, բանսարկութեամբ, շոգմոգութեամբ, քսու, դատարկաբանութեամբ, և ծաղու, զրախօսութեամբ, հերձախօսութեամբ, և անիծաբանութեամբ, տրտնջելով, դժգոհելով, բամբասելով, և հայհոյելով. մեղայ Աստուծոյ:

Մեղայ գողութեամբ ձեռացս, ագահելով, զրկելով, հարկանելով, սպանանելով,

և ընդ գարշս ածելով. մեղայ Աստուծոյ:

Մեղայ ամենայն յօգուածովք շինուածոյս եւ ամենայն անդամօք մարմնոյս. հնգեակ զգայարանօքս, և վեցեկի շարժմամբս. վերամբարձ ոտնահարութեամբ, և վայրաքարչ մեղկութեամբ. յաջ և յահեակ խոտորելով, զառաջնոցն մեղանջելով, եւ վերջնոցն չար նշաւակ գոլով. մեղայ Աստուծոյ:

Այլ և մեղայ եօթնիցս յանցանօք՝ մահացու մեղօք. հպարտութեամբ, նախանձու, բարկութեամբ, ծուլութեամբ, ազահութեամբ, որկրամոլութեամբ, բղջախահութեամբ, և մասամբք սոցին. մեղայ Աստուծոյ:

Այլ և մեղայ ամենայն պատուիրանացն Աստուծոյ, յանձնառելեացն և հրաժարելեացն, զի ոչ զյանձնառականսն կատարեցի, և ոչ ի հրաժարելեացն հեռացայ: Զօրէնս առի՝ և յօրինացն հեղգացայ. ի կարգս քրիստոնէութեան հրաւիրեցայ՝ եւ գործովս անարժան գտայ. գիտելով զչարն կամաւ կորացայ, և ի բարեաց գործոց ես ինձէն հեռացայ. վա՛յ ինձ, վա՛յ ինձ, վա՛յ

ինձ : Զո՞րն ասեմ, կամ զո՞րն խոստովա-  
նիմ . զի անթիւ են յանցանք իմ, անասելի  
են անօրէնութիւնք իմ, աններելի են ցաւք  
իմ, և անբժշկելի են վէրք իմ . մեղայ Աս-  
տուծոյ :

### ՅԵՏ ԽՈՍՏՈՎԱՆԵԼՈՅ ԶՄԵՂՍ

Քննո՛ղ գաղտնեաց մեղայ քեզ, կա-  
մայ և ակամայ՝ գիտութեամբ և անգիտու-  
թեամբ . թողութիւն շնորհեա՛ մեղաւորիս,  
զի ի ծննդենէ սուրբ աւագանին մինչև ցայ-  
սօր՝ մեղուցեալ եմ առաջի Աստուածու-  
թեան քո . զգայարանօք իմովք և ամենայն  
անդամօք մարմնոյս . և ողորմեա՛ քո ա-  
րարածոց՝ և ինձ բազմամեղիս :

Հայր սուրբ, զքեզ ունիմ միջնորդ  
հաշտութեան և բարեխօս առ միածին Որ-  
դին Աստուծոյ . զի իշխանութեամբդ որ  
տուեալ է քեզ, արձակեսցես զիս ի կապից  
մեղաց իմոց, աղաչեմ զքեզ :

## Հ Ա Ռ Ա Չ Ա Ն Ք

ՆԱԽ ՔԱՆ ԶՀԱՂՈՐԴՈՒԹԻՒՆ

ԳՐԻԳՈՐԻ ՆԱՐԵԿԱՑԻՈՅ — ԲԱՆ ԽԷ՝

Եւ արդ, զի՞նչ գոյ ասել ամաչեցելոյս  
յերեսաց մեծիդ ահաւորութենէ, բայց եթէ  
համրանալ, և հող ի բերան եղեալ, լռել  
ի սրտի՝ ըստ մարգարէութեանն խրատու,  
ահա՛ ի բարւոյն կարկառեալ ի յոյս: Իսկ  
եթէ զփականս շարժողութեան շրթանցս  
բացից, բռնադատեցից՝ խօսել կամեցեալ,  
դարձեալ զնոյն ձայն կրկնակական եղերեր-  
գութեան լալեաց բազմութեան՝ խէթ մը-  
տացս յառաջադրէ:

Եւ արդ, ողբակից մեծ մեղաւորին՝  
անօրինեցելոյ կամաւ առ ի մահ, զնորին  
գոչումն երկրորդեցից և ես ընդ նմին. մե-  
ղա՛յ, Տէր, մեղա՛յ, և անօրէնութեանց ի-  
մոց ինձէն վկայեմ: Հիւսեալ ընդ նմին  
զբանս յիսներորդի Սաղմոսին, անթիւս  
զրեմ զպարտուցս սակ՝ անձինս մեղանաց՝  
քան զհող երկրի հողմահոս փոշւոյ ընդ օդս  
տարածեցելոյ: Մեղայ յերկինս եւ առաջի

քոյ, ընդ Անառակ որդւոյն պատկառեցելոյ՝ հայրենի գթոյթ վերստին դարձեալ թախանձ արկանեմ եւ զողորմելին ձայն աղերսանաց՝ արտօսրածին ողբովք զոչման ի տխուր դէմս մատուցեալ, առաջի քոյ տարածանեմ: Հայր գթութեանց, Աստուած բոլորից, չեմ արժանի կոչիլ եւ ո՛չ բնաւին առ այս անուանիլ, ո՛չ միայն որդի, այլ եւ անպիտան ապաբան վարձկան:

Ընկա՛լ զսովեալս տարագրական՝ պարտապան մնասուց եւ զցաւ քաղցոյս լլկանաց նեղելոյս եւ նուաղելոյս՝ կենաց քո հացիւդ բժշկեսցես: Լե՛ր ընդ առաջ քո ողորմութեամբդ՝ ի սկզբնաւորս ապաւինութեան. զգեցո՛, գթա՛ծ եւ անոխակալ, անօրինեալս մեղապարտի՝ զնախակապուտ հանդերձին ծածկոյթ. աւանդակորոյս ձեռացս աղտեղեալ մեղօք, զկնիք մատանւոյն համարձակութեան՝ ամենառատ կամօք մատուցես. զգարչապարացս թշուառութիւն մերկութեան ոտիցս՝ պատսպարութեամբ աւետարանական ամրավերարկուօղիցս կօշկաց՝ ի յօձին թիւնից միշտ ամրացուցես: Զգուարակդ պարարակ եզինդ

երկնայնոյ, որ է միածին Որդիդ քո՝ օրհնեալ իսկապէս մարդասիրութեամբ, կարօտելոյս բարեաց՝ նուիրեա՛ . որ մատուցեալ միշտ եւ անպակաս մնայ ի լրութեան յարակայ, զենեալ ի սպանդարանի անթիւ սեղանոց՝ անսպառութեամբ . բոլոր յամենեսին եւ բնաւ յամենայնում, էութեամբ յերկինս եւ իսկութեամբ ի ստորինս, աննուազ մարդկութեամբ եւ անթերի Աստուածութեամբ . փշրեալ բաշխի ի մասունս անհատս, զի զհամայնն հաւաքեսցէ առ ի նոյն մարմին իւրումն գլխոյ . քեզ փառք ընդ նմին, Հա՛յր ողորմութեան, յաւիտեանս . Ամէն :

## Գ Ո Ջ ՈՒԹԻԻՆ

### Ի ԺԱՄՈՒ ՀԱՂՈՐԴՈՒԹԵԱՆ

Ինձ մերձենալ առ Աստուած բարի է, եւ գնել զյոյս իմ առ Տէր :

Զբաժակ փրկութեան ընկալայց, եւ զանուն Տեառն կարգացից :

Զբերան իմ բացի եւ առի զհոգի, ի պատուիրանս քո փափաքեաց անձն իմ :



## Ա Ղ Ե Ր Ս Ա Ն Ք

### Յ Ե Տ Հ Ա Ղ Ո Ր Դ Ո Ւ Թ Ե Ա Ն

Գ Ր Ի Գ Ո Ր Ի Ն Ա Ր Ե Կ Ա Յ Ի Ո Յ — Բ Ա Ն Բ .

Եւ արդ՝ քանզի առ բարձրեալն Աստուած յօղաւորական շրթամբք կարդաս, որ գործովք միայն գրաւի եւ ոչ ստեղծարանութեամբ կաշառի, որ յեզիպտոս միշտ ունիս զսրտիդ զդարձն, զի՞նչ օրինակ առայս քեզ նմանագոյն եւ յարմարական աստանօր եղից՝ անձն իմ պարտաւոր: Պատժակիցս կործանեցելոյն Սողոմայ, ըմբերանեալ դատախազս Նինուէի, անարի բարբարոսս քան զտիկինն հարաւային, վատթարագոյնս քան զՔանան, յամառեցեալս քան զԱմաղէկ, անբժշկականս քաղաք դըրօշելոց, նշխար մնացեալ՝ ապստամբութեան հինն Իսրայելի, յիշատակարան պահեալ՝ ուխտագանցութեանն Յուդայ. կըշտամբեալս գեր քան զԾուր, տարամերժեալս քան զԾայդան, խորդաբարոյս քան զԳալիլեա, աններելիս քան զանհաւանն կափառնաում, պարսաւեցեալս իբր զՔորա-

զին, բամբասեցեալս ընդ Բեթսայիթայ, անպարկեշտ ծաղկեալ ալիքս՝ Եփրեմի, աղու աղաւնիս միշտ յիմարութեամբ՝ այլ ո՛չ հանդարտութեամբ, ի կորեանց առիւծուց՝ անձնական օծս եղեունային, կերպս ձուոց քարբից՝ լցեալ ժանտութեամբ, պատկերս վերջին հարուածոցն՝ Երուսաղէմի, ըստ բանին Տէրունի՝ եւ տեսանողացն ձայնի: Տաղաւարս մերժեալ՝ հասեալ ի կործանումն, խորտակեալ դրացս վատահարան, եւ կրկին ծրդեալ շինուածս խօսուն, թողեալ ժառանգութիւնս յարմարական, մոռացեալ տունս Աստուածակերտ, ըստ բանից նախագրելոցն՝ Մովսէսի Դաւթայ եւ Երեմիայի: Յարկս բանական՝ ունողս բորոտութեան, հարուածեալս խրատու քերմանն՝ օրինիւ կազդուրեալ, օծեալ կաւովն՝ ողորջական հեզութեամբն. անճարակ գտեալ յելս հնարից, քակտեալ վերստին ձեռամբ շինողին, արտաքս ընկեցեալ իրաւացի հատուցմամբ հրամանաւ հզօրին՝ ի տեղի անսուրբ. հերքեալ տարագրեալ խտրոցաւ մեծաւ՝ ամենայնիւ առանց խնայելոյ, ծածկեցեալ դրամս յերկրի չարեօք, ըստ աւան-

դակորոյս ժխտողին՝ որ յաւետարանին ցուցանի :

Այլ դու, Աստուած, Աստուածդ հոգւոց եւ ամենայն մարմնոց՝ ըստ դաւանելոյ աստուածաշնորհին, երկայնամիտ եւ բազումողորմ՝ ընդ սրբոյն Յովնանու ձայնին, շնորհեա՛ կատարել ի քոյդ հաճութիւն օրհնեալդ կամաց՝ զսկզբնաւորեալ մատեան մաղթանաց այսր ողբերգութեան : Եւ ընդ լալով սերմանել բանիւ ի նախընթաց չուսաստիճանաց օթեւանացս պատրաստութեան, ի կատարածն ժամանելոյ հաւաքման հնձոցն՝ դարձայց բերկրեցեալ լրութեամբ քաւութեան՝ պտղոյն երանութեան որ ահիցն բարութեան : Մի՛ տացես ինձ արգանդ սրտի անորդի՛ իբր Իսրայելի, եւ ստինս աչաց ցամաքեալս, ո՛վ ամենագութ : Լո՛ւր բանից մաղթողիս, հզօր եւ ողորմած, նախ քան երկնի, եւ երկին երկրի, եւ նա՛ ցորենոյ եւ գինւոյ եւ ձիթոյ, եւ նոքա Իսրայելի : Եւ երկնաւորացն աղերս որ առ քեզ՝ հոգւոյս ազգեսցէ, քան թէ տարերաց ապականացուաց : Դու ստեղծիչ՝ եւ ես կաւ . բա՛ց տարակուսելոյս ի մուտս մաղ-

Թանաց այսր հեծութեան՝ կամս քաղցրու-  
 թեան՝ զօրանալ աստէն. զի մի՛ ի բանալ  
 վերնայինն երկնի, անընտիր գտեալ կրթու-  
 թեան վայելման լուսոյ՝ իբր զնիւթ մոմոյ  
 սպառեցայց ջնջեալ ի միջոյ: Ոգի՛ զրկե-  
 լոյս, ըստ մաղթանաց գոչման ասողին, եւ  
 ոյժ թալկացելոյս, եւ կեանք՝ մաշելոյս  
 մտացս խղճիւ, այլ ո՛չ տաժանամար՝ կրից  
 աշխատութեան՝ զքեզ խնդրելոյ. ա՛ռ զա-  
 ւանդ մաղթանացս, եւ տո՛ւր զողորմութիւն  
 քո շնորհացդ. ընկա՛լ զփոքրս ի տկարէս,  
 եւ շնորհեա՛ զմեծդ՝ առ ի հզօրէդ. զօրացո՛  
 զբանս զղջման, առաքեալ առ մեզ զՀոգիդ  
 ի բարձանց՝ Աստուածաշունչ պատգամօքս  
 ի սմա եղելոցս: Պարգեւեա՛, բարերար,  
 զառակն Եսայեայ լուսաւորել առ ճշմար-  
 տութիւնն, մատուցանելով մահու արժա-  
 նոյս՝ ընդ պղնձոյս գոյի անարգս ձայնի՛  
 զոսկի քո շնորհի, ընդ անզարդութեան  
 երկաթոյս սևութեան գունոյս՝ պղինձ պըճ-  
 նալից, ցոյցք առաքինութեան հրաշեկ Լի-  
 բանանի:

Ընդէ՞ր կարծրացուցանես զսիրտ եղ-  
 կելոյս չերկնչել ի քէն, անճա՛ռ եւ ահա-

և որ: Մի՛ եղէց անպտուղ ի փոքր վաստա-  
 կոյս՝ իբր ապաջան սերմանող անբեր երկ-  
 րի: Մի՛ լիցի ինձ երկնել՝ եւ ո՛չ ծնանել,  
 ողբալ՝ եւ ո՛չ արտասուել, խորհել՝ եւ ոչ  
 հառաչել, ամպել՝ եւ ո՛չ անձրեւել, ըն-  
 թանալ՝ եւ ո՛չ հասանել, ինձ ձայնել՝ եւ  
 քեզ ո՛չ լսել, պաղատիլ՝ եւ անտես մնալ,  
 կողկողել՝ եւ ո՛չ ողորմիլ, աղաչել՝ եւ ո՛չ  
 ինչ օգտել, զոհել՝ եւ ո՛չ ճենձերել, զքեզ  
 տեսանել՝ եւ դատարկ ելանել: Լո՛ւր ինձ  
 նախ քան զկարդալս իմ առ քեզ, միա՛յնդ  
 հզօր. մի՛ զանվճար տանջանացն տոյժս՝  
 ընդ թուով աւուրց մեղաց կեցելոյս՝ չա-  
 րագործիս ինձ հատուցաներ: Կեցո՛ զիս,  
 զթա՛ծ. լո՛ւր ինձ, ողորմա՛ծ. մարդասիր-  
 եա՛, ներո՛ղ. խնայեա՛. երկայնամի՛տ.  
 պաշտպանեա՛, ապաւէ՛ն. բարերարեա՛,  
 հզօ՛ր, ազատեա՛, ամենակա՛լ. կենագործ-  
 եա՛, նորոգո՛ղ. վերականգնեա՛, ահաւո՛ր.  
 լուսաւորեա՛, երկնայի՛ն. բժշկեա՛, հնա-  
 րաւո՛ր. քաւեա՛, անքննի՛ն. պարգեւա-  
 տըրեա՛, առա՛տ. շնորհազարդեա՛, աննա-  
 խա՛նձ. հաշտեա՛, անախտակի՛ր. ընկա՛լ,  
 անոխակա՛լ. սրբեա՛ ի պարտաց, օրհնեա՛լ:

Եթէ յառեցից զաչս իմ նայեցեալ ի հայեցուածս երկուց վտանգից՝ յաւուր թըշուառութեան՝ զքոյդ տեսից փրկութիւն, յոյս և խնամակա՛լ. եթէ նկատեալ դիտեցից ի վեր յամենագրաւ ուղին սոսկալի, հրեշտակ քո խաղաղութեան՝ քաղցրութեամբ ինձ պատահեսցէ՛ : Յոյց ինձ, Տէր, ի յելիցն աւուր շնչոյս արձակման՝ մաքրութեան ոգի լուսով ամբարձեալ ի յերկնաւորացն երջանկաց՝ պարգևօք սիրոյ քոյ եկեալ հասեալ յարդարոցն կատարելոց : Կարեաց ինձ կցորդ ժամանեցուսցես. զանակնկալն բարի՝ չարիս. ի յուսահատութեանն աւուր՝ աւետարան շնորհեսցես : Քա՛լ լիցի քեզ, բարեբանեա՛լ, որ փրկութիւնդ ես ամենայնի, եթէ ախտացեալս քո ոչխարի՝ զազան դժնդակ տացես ուղեկից, մեղօք մեռելոյս՝ անա՛խտ կեանք, կործանելոյս պարտեօք՝ փրկութի՛ւն :

Արդեօք մոռասցի՞ս զբարերարելդ՝ ալընկալութի՛ւն. անտեսեսցե՞ս զգթասիրելդ՝ խնամո՛ղ . այլայլեսցե՞ս զմարդասիրելդ՝ անփոփո՛խ . նահանջեսցե՞ս զկենագործելդ՝ անվախճա՛ն . թողուցո՞ւս զողորմութիւնդ՝

երջանի՛կ պտուղ : Աղաւաղե՞ս զքաղցրու-  
 թիւնդ , բարեշնո՛րհ ծաղիկ , անպատուես-  
 ցե՞ս զնիւթ պանծանաց քումդ ճոխութեան .  
 յեղանակեսցե՞ս զփառս կենաց քումդ բարձ-  
 րութեան . ո՞չ պահեսցես զվայելչական  
 զարդ պայծառութեանդ քում պսակի : Եթէ  
 ողորմածացն է երանութիւն , այլ դու բնաւ  
 իսկ արքայութիւն՝ լցեալ փափաքմամբ ,  
 ո՞չ զբոլորն պարգևեսցես փրկութիւն . ո՞չ  
 մատուցանիցես դեղ վիրացս , ո՞չ սպեղա-  
 նիս՝ խոցուածոյս , ո՞չ դարման՝ տկարու-  
 թեանս . ո՞չ ծագեսցես լոյս ի խաւարի՝ յու-  
 սացելոցս ի քո զօրութիւնդ , ապաւէնդ կե-  
 նաց , պարգե՛ւդ տիեզերաց : Որ միայնդ  
 ունիս փառս ինքնութեամբ , իսկութեամբ  
 և ի յարակայ մշտնջենաւորութեամբ , վը-  
 կայեալ ի բնաւից , գովեալ ի բոլորից , օրհ-  
 նեալ և փառաւորեալ յերիս յաւիտեանս ,  
 և անդր քան զպայման սահմանի իմանալ-  
 եացն յաւիտենից . Ամէն :





Երեւոյի մի Տեղապետ,  
Միով բնութեամբ Աստուածութիւն:



## Հ Ա Ն Գ Ա Ն Ա Կ    Հ Ա Ի Ա Տ Ո Յ

Հաւատամք ի մի Աստուած՝ ի Հայրն  
ամենակալ՝ յարարիչն երկնի և երկրի, ե-  
րևելեաց և աներևութից:

Եւ ի մի Տէր Յիսուս Քրիստոս՝ Որ-  
դին Աստուծոյ, ծնեալն յԱստուծոյ Հօրէ՝  
միածին այսինքն յէութենէ Հօր: Աստ-  
ուած յԱստուծոյ, լոյս ի լուսոյ, Աստուած  
ճշմարիտ՝ յԱստուծոյ ճշմարտէ, ծնունդ  
և ոչ արարած: Նոյն ինքն ի բնութենէ  
Հօր, որով ամենայն ինչ եղև յերկինս եւ  
ի վերայ երկրի, երևելիք և աներևոյթք:  
Որ յաղագս մեր մարդկան և վասն մերոյ  
փրկութեան՝ իջեալ ի յերկնից մարմնացաւ,  
մարդացաւ, ծնաւ կատարելապէս ի Մա-  
րիամայ սրբոյ կուսէն Հոգւովն Սրբով: Ո-  
րով էառ զմարմին, զհոգի և զմիտ և զա-  
մենայն որ ինչ է ի մարդ, ճշմարտապէս և  
ոչ կարծեօք: Չարչարեալ, խաչեալ, թաղ-  
եալ, յերրորդ աւուր յարուցեալ, ելեալ ի  
յերկինս նովին մարմնովն՝ նստաւ ընդ աջմէ  
Հօր: Գալոց է նովին մարմնովն և փառօք  
Հօր ի դատել զկենդանիս և զմեռեալս,

որոյ թագաւորութեան ոչ գոյ վախճան :  
 Հաւատամք և ի Սուրբ Հոգին՝ յանեղն  
 և ի կատարեալն, որ խօսեցաւ յօրէնս և ի  
 Մարգարէս և յԱւետարանս : Որ էջն ի Յոր-  
 դանան, քարոզեաց զԱռաքեալն, և բնա-  
 կեցաւ ի սուրբսն :


Հաւատամք և ի մի միայն ընդհանրա-  
 կան և յԱռաքելական Եկեղեցի, ի մի մը-  
 կըրտութիւն, յապաշխարութիւն, ի քաւու-  
 թիւն և ի թողութիւն մեղաց : Ի յարու-  
 թիւն մեռելոց, ի դատաստանն յաւիտենից  
 հոգւոց և մարմնոց, յարքայութիւնն երկ-  
 նից և ի կեանսն յաւիտենականս :

Իսկ որք ասեն՝ էր երբեմն, յորժամ  
 ոչ էր Որդի. կամ էր երբեմն, յորժամ ոչ  
 էր Սուրբ Հոգի. կամ թէ՛ յոչէից եղեն,  
 կամ յայլմէ էութենէ ասեն լինել զՈրդին  
 Աստուծոյ եւ կամ զՍուրբ Հոգին. եւ թէ՛  
 փոփոխելիք են կամ այլայլելիք, զայնպի-  
 սիսն նզովէ կաթուղիկէ եւ Առաքելական  
 սուրբ Եկեղեցի :

Ի Սրբոյ Հուսաւորչէն մերմէ Կասացեալ :

Իսկ մեք փառաւորեսցուք որ յառաջ

քան զյաւիտեանս, երկիրպագանելով Սըրբոյ Երրորդութեանն և միոյ Աստուածութեանն Հօր և Որդւոյ և Հոգւոյն Սրբոյ, այժմ և միշտ և յաւիտեանս յաւիտենից . Ամէն :





Զսուրբ կոյսն թռուցեալ յօդս եւ  
ամպեղին կառօփն ի վեր համբարձեալ:

## Ա Ղ Օ Ր Ք Ե Ր Ե Կ Ո Յ Ե Ա Ն

**Ա**ՌԱՔԵԱ՛, Տէր, զլոյս քո և զճըշմարտութիւն քո, զի առաջնորդեսցեն ինձ և հանցեն զիս ի լեառն սուրբ և ի յարկս քո :

Մտից առաջի սեղանոյ Աստուծոյ առ Աստուած, որ ուրախ առնէ զմանկութիւն իմ :

Խոստովան եղէց քեզ օրհնութեամբ, Աստուած Աստուած իմ :

Արդ՝ ընդէ՞ր տրտում ես անձն իմ, կամ ընդէ՞ր խռովես զիս. յուսա՛ առ Աստուած, խոստովանեա՛ նմա՝ Փրկիչ երեսաց իմոց Աստուած է :

Փառք Հօր և Որդւոյ և Հոգւոյն Սրբոյ :  
Այժմ և միշտ և յաւիտեանս յաւիտենից . Ամէն :

Եւ եւս խաղաղութեան զՏէր աղաչեսցուք,  
ընկալ կեցո՛ եւ ողորմեա :

Օրհնութիւն եւ փառք Հօր եւ Որդւոյ եւ Հոգւոյն Սրբոյ,  
այժմ եւ միշտ եւ յաւիտեանս յաւիտենից . Ամէն :

Եկեսցէ ի վերայ իմ ողորմութիւն քո,  
Տէր, և փրկութիւն քո ըստ բանի քում:

Տաց պատասխանի ոյք նախատեն զիս  
բանիւք, զի ես ի բանս քո յուսացայ:

Մի՛ ի բացեայ առներ ի բերանոյ իմմէ  
զբան ճշմարտութեան մինչև յոյժ, զի յի-  
րաւունս քո յուսացայ:

Պահեցի զօրէնս քո յամենայն ժամ,  
յաւիտեան և յաւիտեանս յաւիտենից:

Գնայի ես յանդորրու, զի զպատուի-  
րանս քո խնդրեցի:

Խօսէի զվկայութիւնս քո առաջի թա-  
գաւորաց, և ոչ ամաչէի:

Խորհէի ի պատուիրանս քո, զոր սի-  
րեցի:

Համբարձի զձեռս իմ ի պատուիրանս  
քո զոր սիրեցի, և խորհէի յարդարութեան  
քում:

Յիշեա զբան ծառայի քո, յոր և յու-  
սացուցեր զիս:

Սա մխիթարեսցէ զիս ի խոնարհութեան  
իմում, զի բան քո կեցոյց. զիս:

Ամբարտաւանք անիրաւեցան յիս յոյժ,  
այլ յօրինաց քո ես ոչ խոտորեցայ:

Յիշեցի զիրաւունս քո յաւիտենից,  
Տէր, և մխիթարեցայ:

Տրտմութիւն կալաւ զիս ի մեղաւո-  
րաց, և ոյք թողին զօրէնս քո:

Գովելի են ինձ իրաւունք քո ի տեղ-  
ւոջ պանդխտութեան իմոյ:

Յիշեցի ի գիշերի զանուն քո, Տէր, և  
պահեցի զօրէնս քո:

Սա եղև ինձ ճանապարհ ի կեանս, զի  
զարդարութիւնս քո խնդրեցի:

Զանօրէնս ատեցի, և զօրէնս քո սի-  
րեցի:

Օգնական և Փրկիչ իմ ես դու, և ես  
ի բանս քո յուսացայ:

Ի բաց եղերուք յինէն չարք, և քննե-  
ցից զպատուիրանս Աստուծոյ իմոյ:

Օգնեա ինձ ըստ բանի քում, և կեցո  
զիս, և մի՛ յամօթ առներ զիս ի յուսոյ իմմէ:

Օգնեա ինձ և ապրեցո զիս, և խորհե-  
ցայց յիրաւունս քո յամենայն ժամ:

Անարգեցեր զամենեսեան որք ապրս-  
տամբ եղեն յարդարութեանց քոց, զի ա-  
նիրաւութեամբ էին խորհուրդք նոցա:

Յանցաւորս համարեցայ զամենայն մե-

դաւորս երկրի, վասն այսորիկ սիրեցի  
զպատուիրանս քո :

Բւեռեա ընդ երկիւղ քո զմարմին իմ,  
զի ի դատասաանաց քոց երկեայց յոյժ :

Մերձեսցին խնդրուածք իմ առաջի քո,  
Տէր, ըստ բանի քում իմաստուն արա զիս :

Մտցեն աղօթք իմ առաջի քո, Տէր, և  
բանիւ քով փրկեա զիս :

Բղխեսցեն շրթունք իմ՝ զօրհնութիւնս  
քո, յորժամ ուսուսցես ինձ զարդարու-  
թիւնս քո :

Սօսեսցի լեզու իմ զբանս քո, զի ա-  
մենայն պատուիրանք քո արդարութեամբ  
են :

Եղիցի ձեռն քո ի կեցուցանել զիս, զի  
զպատուիրանս քո ընտրեցի :

Յանկացայ փրկութեան քում, Տէր, և  
օրէնք քո խօսք իմ էին :

Կեցցէ անձն իմ օրհնեսցէ զքեզ, և ի-  
րաւունք քո օգնեսցեն ինձ :

Մոլորեցայ ես որպէս զոչխար կորուս-  
եալ. խնդրեա զծառայս քո զի զպատուի-  
րանս քո ես ոչ մոռացայ :

Մի՛ եկեսցեն ի վերայ մեր ոտք ամբար-



տաւանից, և ձեռք մեղաւորաց մի դողացուցեն զմեզ :

Անդ անկցին ամենեքեան ոյք գործեն զանօրէնութիւն . մերժեսցին և այլ մի՛ կարացեն հաստատիլ :

Ես ի Տէր յուսացայ, ցնծացայց եւ ուրախ եղէց յԱստուած փրկիչ իմ :

Տէր, Տէր ետ ինձ զօրութիւն, եւ կացոյց զօտս իմ ի հաստատութեան, ի վերայ պարանոցի թշնամւոյն կացոյց զիս, և հանգոյց զիս երազ երազ :

Որ բնակեալն է յօգնութիւն բարձրելոյն, ընդ հովանեաւ Աստուծոյ յերկինս հանգիցէ :

Ասասցէ Տեառն՝ ընդունող իմ ես դու, ապաւէն իմ Աստուած, և ես յուսամ ի նա :

Նա փրկեսցէ զիս յորոգայթէ որսողին, և ի բանիցն ի խռովութենէ :

Ի թիկնամէջս իւր ընկալցի զքեզ, և ի հովանի թևոց նորա յուսասցիս :

Որպէս զէն շուրջ եզիցի զքեւ ճշմարտութիւն նորա :

Ոչ երկիցես դու յերկիւղէ գիշերի, եւ ոչ ի նետէ որ թռչի ի տուէ :

Յիրէ որ շրջի ի խաւարի, ի գայթակ-  
ղութենէ դիւին ի հասարակ աւուր:

Անկցին ի կողմանէ քումմէ հազարք,  
և բիւրք ընդ աջմէ քումմէ, և առ քեզ  
ինչ ոչ մերձեսցին:

Բայց միայն աչօք քովք հայեսցիս դու,  
և զհատուցումն մեղաւորաց տեսցես, զի  
դու, Տէր, յոյս իմ ես:

Զբարձրեալն արարեր քեզ ապաւէն,  
զի ոչ հասցեն առ քեզ չարք, և տանջանք  
մի' մերձեսցին ի յարկս քո:

Հրեշտակաց իւրոց պատուիրեալ է վասն  
քո, ի պահել զքեզ յամենայն ճանապարհս քո:

Ի բազուկս իւրեանց ընկալցին զքեզ,  
զի մի' երբեք հարցես զքարի զոտն քո:

Ի վերայ իժից և քարբից գնասցես դու,  
և առ ոտն կոխեսցես զառիւծն և զվիշապն:

Քանզի յիս յուսացաւ, և փրկեցից զնա .  
հովանի եղէց նմա, զի ծանեաւ զանուն իմ:

Կարդասցէ առ իս, և ես լուայց նմա,  
և առ նմա եղէց ի նեղութեան:

Փրկեցից և փառաւոր արարից զնա, եր-  
կայն աւուրբք լցուցից, և ցուցից նմա ըզ-  
փրկութիւն իմ:

Առ քեզ, Տէր, համբարձի զաչս իմ, որ  
քնակեալդ ես ի յերկինս:

Որպէս աչք ծառայի ի ձեռն Տեառն իւ-  
րոյ, և որպէս աչք աղախնոյ ի ձեռն տիկ-  
նոջ իւրոյ:

Այնպէս են աչք մեր առ քեզ, Տէր Աստ-  
ուած մեր, մինչև ողորմեսցիս ի վերայ  
մեր:

Ողորմեա մեզ, Տէր, ողորմեա մեզ, զի  
բազում լցաք արհամարհանօք:

Եւս առաւել լցան անձինք մեր նախա-  
տանօք, որք նախատէին զմեզ, և արհա-  
մարհանօք ամբարտաւանից:

Աստուած, յանուան քում կեցո զիս, և  
ի զօրութեան քում իրաւ արա ինձ:

Աստուած, լուր աղօթից իմոց, ունկն  
դիր բանից բերանոյ իմոյ:

Օտարք յարեան ի վերայ իմ, և հզօրք  
խնդրեցին զանձն իմ, և ոչ համարեցան  
զքեզ Աստուած առաջի իւրեանց:

Ահա Աստուած օգնական իմ, և Տէր ըն-  
դունող հոգւոյ իմոյ:

Ի դարձուցանել զչարն ի թշնամիսն իմ,  
ճշմարտութեամբ քով սատակեա զնոսա:

Ես կամօք իմովք պատարագս մատուցից քեզ, և խոստովան եղէց անուան քում, Տէր, զի բարի է:

Յամենայն նեղութենէ իմմէ փրկեցեր զիս. և ի թշնամիս իմ ետես ակն իմ:

Օրհնեալ ես Տէր Աստուած հարցն մերոց, գովեալ եւ առաւել բարձրացեալ անուն քո յաւիտեան:

Եւ օրհնեալ է անուն սուրբ փառաց քոց, գովեալ և առաւել բարձրացեալ անուն քո յաւիտեան:

Օրհնեալ ես ի տաճարի փառաց սրբութեան քո, գովեալ և առաւել բարձրացեալ անուն քո յաւիտեան:

Օրհնեալ ես ի վերայ աթոռոյ արքայութեան քո, գովեալ և առաւել բարձրացեալ անուն քո յաւիտեան:

Օրհնեալ ես որ նստիս ի քրովբէս և հայիս յանդունդս, գովեալ և առաւել բարձրացեալ անուն քո յաւիտեան:

Օրհնեալ ես ի վերայ հաստատութեան երկնից, գովեալ և առաւել բարձրացեալ անուն քո յաւիտեան:

Օրհնեցէք զԱստուած ի սրբութեան նո-

րա, օրհնեցէք զնա ի հաստատութեան ի զօրութեան նորա:

Օրհնեցէք զնա ի զօրութեան նորա, օրհնեցէք զնա ի բազում մեծութեան նորա:

Օրհնեցէք զնա ի ձայն օրհնութեան, օրհնեցէք զնա սաղմոսիւք և օրհնութեամբ:

Օրհնեցէք զնա ցնութեամբ, գովեցէք զնա ուրախութեամբ:

Օրհնեցէք զնա ի բանս քաղցր, գովեցէք զնա ի բարբառ լսելիս:

Օրհնեցէք զնա ի ձայն գոհութեան, ամենայն հոգիք օրհնեցէք զՏէր:

Արդ արձակեա՛ զծառայս քո Տէր, ըստ բանի քում ի խաղաղութիւն, զի տեսին աչք իմ զփրկութիւն քո զոր պատրաստեցեր առաջի ամենայն ժողովրդոց:

Հոյս յայտնեցար հեթանոսաց, և փառք ժողովրդեան քում Իսրայելի:

Զգեցեր զձեռն քո՝ և փրկեաց զիս աջ քո, և Տէր հատուցէ ընդ իմ:

Տէր, ողորմութիւն քո յաւիտեան, ըզգործս ձեռաց քոց մի՛ անտես առներ:

Տէր, հան ի բանտէ զանձն իմ, գոհանամ զանուանէ քումմէ:

Եւ քեզ սպասեն արդարքն մինչև հատուցես :

Մեծացուցէ անձն իմ զՏէր և ցնծասցէ հոգի իմ Աստուծով փրկչաւ իմով :

Այց արար ի վերայ խոնարհութեան աղախնոյ իւրոյ, այսուհետև երանիցեն ինձ ամենայն ազգք :

Արար ընդ իս մեծամեծս հզօրն, եւ սուրբ է անուն նորա :

Ողորմութիւն արար ազգաց յազգս երկիւղածաց իւրոց, և արար զօրութիւն բազկաւ իւրով :

Յրուեաց զամբարտաւանս ի մտաց սըրտից, և քակեաց զհզօրս յաթոռոց :

Զխոնարհս բարձրացոյց, զկարօտս ելից բարութեամբ, և զմեծատունս արձակեաց ունայնս :

Պաշտպանեաց Իսրայելի ծառայի իւրոյ, յիշելով զողորմութիւն իւր :

Որպէս խօսեցաւ առ հարսն մեր, ընդ Աբրահամու և զաւակի նորա յաւիտեան :

Տուր զօրութիւն ծառայի քո, կեցողորդի աղախնոյ քո, և արա առ իս նշան բարութեան :

Տեսցեն ատելիք իմ և ամաչեսցեն, զի  
դու Տէր, օգնեցեր ինձ և մխիթարեցեր  
զիս:

Փառք Հօր և Որդւոյ և Հոգւոյն Սրբոյ:  
Այժմ և միշտ և յաւիտեանս յաւիտե-  
նից. Ամէն:



## Մ Ա Ղ Թ Ա Ն Ք

Անձն իմ ի ձեռս քո է յամենայն ժամ, եւ ի սուրբ Խաչ քո յուսացեալ եմ թագաւոր երկնաւոր, զբազմութիւն սրբոց քոց բարեխօս ունիմ առ քեզ, որ երկայնամիտդ ես առ ամենեսեան, մի՛ անտես առներ զապաւինեալս ի քեզ, այլ պահեա պատուական եւ սուրբ Խաչիւ քով ի խաղաղութեան:

## Ք Ա Ր Ո Ջ

Աղաչեսցուք զամենակալն Աստուած եւ խնդրեսցուք ի նմանէ, զի առաքեսցէ զհրեշտակ խաղաղութեան, որ եկեալ պահեսցէ զմեզ յերկիւղական գիշերիս, ի դիւական խռովութենէ, ամբողջ պահելով զհոգի եւ զմարմին մեր մինչեւ ի կատարումն ժամանակի ամաց մերոց, ամենակալ Տէր Աստուած մեր կեցո եւ ողորմեա:

Զհանգիստ գիշերիս խաղաղութեամբ անցուցանել հաւատով ի Տեառնէ խնդրեսցուք:



Զհրեշտակ խաղաղութեան պահապան  
անձանց մերոց ի Տեառնէ խնդրեսցուք :

Զքաւութիւն եւ զթողութիւն յանցա-  
նաց մերոց ի Տեառնէ խնդրեսցուք :

Զսրբոյ Սաչին մեծ եւ կարող զօրու-  
թիւն՝ յօգնութիւն անձանց մերոց ի Տեառնէ  
խնդրեսցուք :

Եւ եւս միաբան վասն ճշմարիտ եւ  
սուրբ հաւատոյս մերոյ զՏէր աղաչեսցուք :

Զանձինս մեր եւ զմիմեանս Տեառն  
Աստուծոյ ամենակալին յանձն արասցուք :

Ողորմեաց մեզ Տէր Աստուած մեր ըստ  
մեծի ողորմութեան քում . ասասցուք ամե-  
նեքեան միաբանութեամբ :

---

## Ա Ղ Օ Թ Ք

Տէր Աստուած մեր, դու պահեա զմեզ  
խաղաղութեամբ ի գիշերիս յայսմիկ եւ  
յամենայն ժամանակի : Ընդ սուրբ երկիւղ  
քո բեւեռեալ պահեա զմիտս և զխորհուրդս  
մեր, որպէս զի յամենայն ժամ քեւ պահ-  
պանեալ լիցուք յորոգայթից թշնամւոյն,

և քեզ հանցուք զօրհնութիւն և զփառա  
 Հօր և Որդւոյ և Հոգւոյդ Սրբոյ, այժմ և  
 միշտ և յաւիտեանս յաւիտենից. Ամէն :

Խաղաղութիւն ամենեցուն,  
 Աստուծոյ երկիրպագեսցուք :

Հրեշտակի խաղաղութեան յանձն արա  
 զանձինս մեր Տէր զօրութեանց, որ եկեալ  
 պահեսցէ զմեզ անխռովս ի տուէ և ի գի-  
 շերի, յարթնութեան և ի հանգստեան մե-  
 րում. զի դու ես արարիչ լուսոյ և հաս-  
 տիչ գիշերի: Եւ այժմ աղաչեմք զքեզ,  
 Տէր Աստուած մեր, զհանգիստ գիշերիս  
 շնորհեա խաղաղութեամբ անցուցանել, և  
 հասանիլ ի պաշտօն առաւօտու յերկրպա-  
 գութիւն և ի փառաբանութիւն ամենա-  
 սուրբ Երրորդութեանդ, այժմ և միշտ և  
 յաւիտեանս յաւիտենից. Ամէն :

## Ս Ա Ղ Մ Ո Ս

Որաղաղութեամբ յայս և ի սոյն ննջես-  
 ցուք և զարթիցուք, զի դու, Տէր, միայն  
 առանձին յուսով քով բնակեցուցեր զմեզ :

Ի կարգալ իմում լուար ինձ Աստուած ,  
ըստ արդարութեան , ի նեղութենէ ինձ ան-  
դորր արարեր , ողորմեա ինձ և լուր աղօ-  
թից իմոց :

Որդիք մարդկան՝ մինչև յե՞րբ էք խըս-  
տասիրտք , ընդէ՞ր սիրէք զնանրութիւն , և  
խնդրէք զստութիւն :

Ծաներուք զի սքանչելիս արար Տէր  
սրբոյ իւրում , և Տէր լուիցէ ինձ ի կար-  
գալ իմում առ նա :

Բարկանայք՝ և մի՛ մեղանչէք . զոր ինչ  
ասէք ի սիրտս ձեր՝ յանկողինս ձեր զղջա-  
ցարուք :

Մատուցէք պատարագս արդարութեան ,  
և յուսացարուք ի Տէր :

Բազումք ասէին թէ ո՛ր ցուցցէ մեզ ըզ-  
բարութիւն Տեառն . նշանեցաւ առ մեզ  
լոյս երեսաց քոց , և ետուր ուրախութիւն  
սրտից մերոց :

Ի պտղոյ ցորենոյ , գինւոյ և ձիթոյ իւր-  
եանց լցուցեր զնոսա :

Սաղաղութեամբ յայս և ի սոյն ննջես-  
ցուք և զարթիցուք , զի դու , Տէր , միայն  
առանձին յուսով քով բնակեցուցեր զմեզ :

Ալէլուիա Օրթի :  
 Խաղաղութիւն ամենեցուն :  
 Եւ ընդ հոգւոյդ քում :  
 Երկիւղածութեամբ լուարուք :  
 Սրբոյ Աւետարանիս Յիսուսի Քրիստոսի ,  
 որ ըստ Յովհաննու :  
 Փառք քեզ Տէր Աստուած մեր :  
 ՊՈՍԻՍՈՒՄԷ :  
 Ասէ Աստուած :  
 Տէրն մեր Յիսուս Քրիստոս ասէ :

Ամէն ամէն ասեմ ձեզ . եթէ ո՛չ հատն  
 ցորենոյ անկեալ յերկի մեռանիցի , ինքն  
 միայն կայ : Ապա եթէ մեռանիցի , բազում  
 արդիւնս առնէ : Որ սիրէ զանձն իւր՝ ար-  
 ձակէ զնա . և որ ատեայ զանձն իւր յաշ-  
 խարհիս յայսմիկ , ի կեանս յաւիտենականս  
 պահեսցէ զնա : Եթէ ոք զիս պաշտեսցէ ,  
 զկնի իմ եկեսցէ , եւ որ եսն եմ , անդ եւ  
 պաշտօնեայն իմ եղիցի : Եթէ ոք զիս պաշ-  
 տիցէ , պատուեսցէ զնա Հայր իմ :

Փառք քեզ Տէր Աստուած մեր :



## Ք Ա Ր Ո Ջ

Սուրբ Խաչիւս աղաչեսցուք զՏէր՝ զի սովաւ փրկեսցէ զմեզ ի մեղաց, և կեցուսցէ շնորհիւ ողորմութեան իւրոյ. ամենակալ Տէր Աստուած մեր կեցո և ողորմեա :

## Ա Ղ Օ Ք Ք

Պահպանեա՛ զմեզ, Քրիստոս Աստուած մեր, ընդ հովանեաւ սուրբ և պատուական խաչի քո ի խաղաղութեան. փրկեա՛ յերեւելի և յաներևոյթ թշնամւոյն : Արժանաւորեա՛ գոհութեամբ փառաւորել զքեզ ընդ Հօր և ընդ Սրբոյ Հոգւոյդ : այժմ և միշտ և յաւիտեանս յաւիտենից. Ամէն :

Օրհնեալ Տէր մեր Յիսուս Քրիստոս. Ամէն :


Հա՛յր մեր, որ յերկինս ես, սուրբ եղիցի անուն քո : Եկեսցէ արքայութիւն քո. եղիցին կամք քո որպէս յերկինս և յերկրի : Զհաց մեր հանապազորդ տո՛ւր մեզ այսօր : Եւ թող մեզ զպարտիս մեր, որպէս և մեք թողումք մերոց պարտապանաց : Եւ մի՛

տանիր զմեզ ի փորձուիլն . այլ փրկեա՛  
զմեզ ի չարէ : Զի քո է արքայութիւն , և  
զօրութիւն , և փառք յաւիտեանս . Ամէն :

## Մ Ա Ղ Թ Ա Ն Ք

Անկանիմք առաջի քո սուրբ Աստուա-  
ծածին , և աղաչեմք զանարատ զկոյսդ .  
բարեխօսեա՛ վասն անձանց մերոց և ա-  
ղաչեա՛ զմիածին Որդիդ փրկել զմեզ ի  
փորձութենէ և յամենայն վտանգից մերոց :

Որ արձակիչդ ես կապելոց՝ պարգևատու  
ամենեցուն , այսօր հայցմամբ ծերունւոյն՝  
արձակեա և զիս զբաղմամեղս ի կապանաց  
մահու ի կեանսն յաւիտենից :



## Մ Ա Ղ Թ Ա Ն Ք

### Ը Ն Դ Դ Է Մ Ա Ր Հ Ա Ի Ր Ա Ց Գ Ի Շ Ե Ր Ա Յ Ն Ո Ց

Գ Ր Ի Գ Ո Ր Ի Ն Ա Ր Ե Կ Ա Ց Ի Ո Ց — Բ Ա Ն Ժ Բ .

Ընկալ քաղցրութեամբ՝ Տէր Աստուած հզօր, զդառնացողիս զաղաչանս, մատի՛ր գթութեամբ առ պատկառեալս դիմօք. փարատեա՛, ամենապարգե՛ւ, զամօթական տխրութիւնս. բա՛րձ յինէն, ողորմա՛ծ, զանբերելի ծանրութիւնս. անջրպետեա՛, հնարաւո՛ր, զմահացու կրթութիւնս, աւարեա՛, մի՛շտ յաղթող, զխաբողին հաւճութիւնս. բացաղբեա՛, վերնայի՛ն, զմուլելոյն մառախուղ. կնքեա՛, կեցուցի՛չ, զկորուսչին ընթացմունս. ցրուեա՛, ծածկատե՛ս, զըմբռնողին չար գտմունս. խորտակեա՛, անքննի՛ն, զմարտողին դիմեցմունս: Տեառնագրեա՛ քո անուամբդ ըզլուսանցոյց երգ յարկիս. պարփակեա՛ քո ձեռամբդ զառաստաղ տաճարիս. գծագրուեա՛ քո արեամբդ զմուտ սեմոց սենեկիս. կերպացո՛ զքո նշանդ ի հետս ելից մաղ-

թողիս . ամրացո՛ք աջովդ զհանգստեանս  
 խշտիս . մաքրեսցե՛ս ի հաղբից զծածկա-  
 րան անկողնոյս . պահեսցե՛ս քո կամօքդ  
 զտառապեալ անձն հոգւոյս . անխարդախ  
 արասցե՛ս զքո շնորհեալ շունչ մարմնոյս .  
 կացուսցե՛ս շրջափակ զպար զօրուդ երկ-  
 նայնոյ . կարգեսցես՛ ի դիմի ընդդէմ դի-  
 ւացն դասու : Տո՛ւր հանգիստ բերկրու-  
 թեան՝ մահահանգոյնս նիրհման ի խորու-  
 թեան գիշերիս , բարեխօսութեամբ հայց-  
 ուածոց սրբուհոյ Աստուածածնիդ և ամե-  
 նայն ընտրելոց : Ամփոփեալ պարուրեա՛  
 զպատուհան տեսութեանց զգայարանացս  
 իմաստից՝ անզարհուրելի զետեղմամբ , ի  
 ծփական խռովութեանց՝ կենցաղական ըզ-  
 բաղմանց , անըջական երազոց , խօլակա-  
 նաց ցնորից , յիշատակաւ քո յուսոյդ ան-  
 վնասելի պաշտպանեալ : Եւ սթափեալ վե-  
 րըստին ի ննջմանէ ծանրութեան ամենա-  
 զգաստ արթնութեամբ՝ հոգենորոգ զուար-  
 թութեամբ , ի քեզ արձանացեալ զայս ճայն  
 մաղթանաց բուրմամբ հաւատոց , քեզ՝ ա-  
 մենօրհնեալ թագաւո՛ր փառաց , անճառից  
 փառաբանողաց երկնագումար խմբից եր-



գակցեալ՝ յերկինս առաքել: Զի դու փա-  
ռաւորեալ ես յամենայն արարածոց յաւի-  
տեանս յաւիտենից. Ամէն:

## Մ Ա Ղ Թ Ա Ն Ք

### ԱՌ ՈՐԴԻՆ ԱՍՏՈՒԱԾ

ԳՐԻԳՈՐԻ ՆԱՐԵԿԱՑԻՈՅ — ԲԱՆ ԽԱ.

Որդի՛ Աստուծոյ կենդանւոյ՝ օրհնեալդ  
յամենայնի, Հօրդ ահաւորի անքնին ծը-  
նունդ, որ տկարանայ առ ի քէն և ոչ ինչ.  
որ ի ծագել անստուեր նշուլից ողորմու-  
թեան քո փառաց՝ հալին մեղք, հալածին  
դւք, ջնջին յանցանք, խզին կապանք,  
խորտակին շղթայք, կենդանածնին մահաց-  
եալք, բժշկին հարուածք, ողջանան վէրք,  
բառնին ապականութիւնք, տեղի տան տըխ-  
րութիւնք, նահանջին հեծութիւնք, փախ-  
նու խաւարն, մեկնի մէզն, մերժի մառա-  
խուղն, փարատի մռայլն, սպառի աղջա-  
մուղջն, վերանայ մութն, գնայ գիշերն,  
տարագրի տագնապն, չքանան չարիքն,

հալածին յուսահատութիւնք, և թագաւորէ  
ձեռն քո ամենակար քաւի՛չդ, ամենայնի :

Որ ո՛չ եկիր կորուսանել զմարդկան  
ողիս, այլ կեցուցանել. թո՛ղ ինձ զանթիւ  
չարիսն իմ բազում ողորմութեամբդ. զի  
դու միայն ես յերկնի անճառ, և յերկրի  
անզննին, ի տարր գոյի, և յեզերս ծագաց  
աշխարհի, սկիզբն ամենայնի և յամենայ-  
նի. ամենայն լրմամբ օրհնեալ ի բարձունս,  
և քեզ ընդ Հօր և Հոգւոյդ Սրբոյ վայելէ  
փառք յաւիտեանս. Ամէն :

## Մ Ա Ղ Թ Ա Ն Ք

### Ի ԴԻԻԱՅ ՊԱՀՊԱՆՈՒԹԵԱՆ

ԳՐԻԳՈՐԻ ՆԱՐԵԿԱՑԻՈՅ — ԲԱՆ ՂԴ.

Աստուա՛ծ յաւիտենական, բարերա՛ր և  
ամենակա՛լ, ստեղծիչ լուսոյ եւ յօրինի՛չ  
գիշերոյ, կեա՛նք ի մահու, և լո՛յս ի խա-  
ւարի, յո՛յս ակն ունողաց, և երկայնմտու-  
թի՛ւն տարակուսելոց. որ ամենարուեստ  
իմաստութեամբ քո դարձուցանես յայդ

զստուերս մահու, աննուա՛զ ծագումն եւ  
անմուտ արեգակն, քանզի ո՛չ զօրէ ծած-  
կել զփառս տէրութեան քո խաւար գիշե-  
րոյ. որում կրկնի ծունր երկրպագութեան  
ամենայն եղելոց երկնաւորաց և երկրաւո-  
րաց և սանդարամետականաց. որ լսես ըզ-  
հեծութիւն կապելոց, եւ հայիս յաղօթս  
խոնարհաց, և ընդունիս զխնդրուածս նո-  
ցա, Աստուած իմ և թագաւոր իմ, կեա՛նք  
իմ և ապաւէն իմ, յո՛յս իմ և վստահու-  
թիւն իմ, Յիսուս Քրիստոս՝ Աստուածդ ա-  
մենայնի, սո՛ւրբդ՝ հանգուցեալ ի հոգիս  
սրբոց, մխիթարութի՛ւն վշտաց և քաւա-  
րա՛ն մեղուցելոց. որ գիտես զամենայն  
յառաջ քան զլինել նոցա. առաքեա՛ ըզ-  
պահպանողական զօրութիւն աջոյ քո, եւ  
փրկեա՛ զիս յերկիւզէ գիշերի եւ ի դիւէ  
չարէ: Որպէս զի զյիշատակ սոսկալի եւ  
սուրբ քո անուանդ միշտ համբուրեալ շըր-  
թամբք հոգւոյ՝ ըղծութեան շնչոյ, կեցից  
պահպանեալ ընդ այնոսիկ՝ որ կարդան ըզ-  
քեզ ի բոլոր սրտէ:

Եւ ի դրոշմէ Խաչի քոյոյ նշանիդ, զոր  
Աստուածային արեամբ քո ներկեալ նորո-

գեցեր, և ի նոյն շնորհ որդեգրութեան՝ ըզմեզ մկրտեցեր, և ի փառս պատկերի քո նկարեալ յօրինեցեր. այսու պարգևօք աստուածականօք ամաչեսցէ՛ սատանայ, քակտեսցի՛ն մեքենայքն, բարձցին որոգայթքն, պարտեսցի՛ն մարտուցեալքն, պակասեսցի՛ն զէնքն սայրասուրք, մերժեսցի՛ն մէզն, փարատեսցի՛ խաւարն, մեկնեսցի՛ մառախուղն: Բազուկ քո հովանասցի, և ա՛ջ քո կնքեսցէ. վասնզի գթած ես և ողորմած, և անուն քո կոչեցեալ է ի վերայ ծառայից քոց: Եւ քեզ ընդ Հօր Հոգւովդ Սըրբով՝ փա՛ռք իշխանութիւն և պատիւ յաւիտեանս յաւիտենից. Ամէն:



## Խ Ն Գ Ր Ո Ւ Ա Մ Ք

ԳՐԻԳՈՐԻ ՆԱՐԵԿԱՑԻՈՅ — ԲԱՆ ԾԷ.

Քրիստո՛ս Աստուած , անո՛ւն անաւոր , մեծութեան տեսակ , անքնին բարձրութեան պատկեր , անսահման զօրութիւն , կերպարա՛ն փրկութեան լուսոյ , պաշտպա՛ն կենաց , դուռն արքայութեան՝ վերնում հանգստեանն , ճանապա՛րհ հանդարտութեան , ապաւինութի՛ւն՝ նորոգ և անտրխրական երանութեան , ամենակա՛լ ինքնիշխանութի՛ւն՝ բոլոր էականութեան , օրհնութեան կոչումն , աւետեաց ձայն , բերկրութեան բարբառ , անմահութեան դեղ , որդի՛ անճառ՝ Աստուծոյ միոյ , որ ինձ անհրնարին է , քեզ դիւրին է . որ ինձ անհասն է , քեզ սահմանեալ է . որ ինձ անանցն է , քեզ հպաւոր է . որ եղկելոյս ինձ ծածկեցեալն է , քումդ երանութեան մերձաւոր է . որ ինձ անկարելին է , քեզ կատարեալ է . որ ինձ անկշռելին է , քումդ անճառութեան չափեալ է . որ ինձ յուսահատութեանն է , քեզ սփոփանաց է . որ ինձ անբժշկականն է , քեզ անվտանգելի

է. որ ինձ հեծութեանն է, քեզ խնդու-  
թեան է. որ ինձ ծանունք են, քեզ թե-  
թեազոյնք են. որ ինձ եղծեալն է, քումդ  
զօրեղութեան գրեցեալ է. որ ինձ կորուս-  
եալն է, քեզ ըմբռնեալ է. որ ինձ ան-  
ճառն է, քեզ համարեալ է. որ ինձ մռայլն  
է, քեզ ճառագայթ է. որ ինձ անթիւն է,  
օրհնեալդ քում ձեռին բովանդակեալ է.  
որ ինձ սոսկալին է, քեզ հեշտալի է. որ  
ինձ փախչելին է, քեզ վանելի է. որ ինձ  
անմատոյցն է, քեզ դիւրահերքելի է. որ  
ինձ մահաբերն է, քումդ էականութեան  
զօրութեան՝ ընդ ոչ գոյսն համարեալ է:

Այլ դո՛ւ, ողորմած Աստուած բոլորից՝  
Տէ՛ր Յիսուս Քրիստոս, և այսմ զօրես առ  
ելիցն հնար՝ եթէ գթասցիս. վասն անուան  
փառաց մեծութեան Հօր քո օրհնելոյ, վասն  
կամաց գթութեան Հոգւոյդ քո Սրբոյ՝ տե՛ս  
ի տաժանաւորս կրից յանդիմանական յայտ-  
նութիւն, և ի խորոց սրտիս ինքնամատոյց  
դատախազութիւն. նայեա՛ ի բնութեանս  
ամենապատաղ խակութիւն, և պարգևեա՛  
բժշկութիւն վիրացս և հնարաւորութիւն  
կորստեանս, զերծումն բազմամասնեայ մա-

հուսա և շաւիղ կենաց ապականելոյս, նորոգութիւն եղծմանս և մուտք յուսոյ ամբարշտելոյս: Եթէ ես զաննմանն ինձ կամս ցուցի, ո՞րչափ առաւել դու զբնաւորականսդ քո զընտանի բարերարութիւնսդ. եթէ ի փշոց պտուղ ընծայեցաւ քաղցրութեան, ո՞րչափ ևս առաւել ի ծառոյդ կենաց՝ ճաշակ անմահութեան. եթէ ես իմոց ատելեաց ողորմութիւն մաղթեցի, դու քոյոյս զիա՛րդ ոչ կրկին մատուցես, հզօ՛ր, յաննուազ առատութենէդ:

Արդ՝ տե՛ս ի քոյդ մեծութիւն, բարձրեա՛լ, նայեցեալ ի յիմս փոքրկութիւն. ընկա՛լ զսակաւ խոստովանութիւնս անհամար մեղացս՝ որ զբնաւն համայն տեսանես. և որպէս զվիմին զթել ոչ զրեցեր, և զաւազոյս փոքու սասանել մի՛ համարեսցես. և իբրև զԴաւթին ընդ մեղայն ասել՝ իսկոյն անցուցեր զպատիժ պարտուցն, և առ իմ ձայնիս հեծութիւն՝ զնոյն գործեսցես երկայնմտութիւն. որ տաս ամենեցուն առատապէս անաչառութեամբ, որպէս յաղթող բարի բազմիմաստ, և ոչ նախատես զյետնեալ ստրուկս: Որպէս ողոր-

մած և ամենաստեղծ, ստացի՛ր վերստին  
 և մի՛ կորուսաներ զբուժեալս արեամբ քո,  
 և զբուժեալս ստեամբ քո, գթա՛ծ: Ձի քո  
 է փրկութիւն, և ի քէն է քաւութիւն. և  
 քեզ վայել է փա՛ռք յամենայնի յաւիտեանս.  
 Ամէն:







## Ա Ղ Օ Թ Ք

### ԻԻՐԱՔԱՆՁԻԻՐ ԱՆՁԻՆ ՀԱԻԱՏԱՑԵԼՈՅ Ի ՔՐԻՍՏՈՍ

Հաւատով խոստովանիմ և երկիրպա-  
գանեմ քեզ՝ Հայր և Որդի և Սուրբ Հոգի,  
անեղ և անմահ բնութիւն, արարիչ հրեշ-  
տակաց և մարդկան և ամենայն եղելոց,  
և ողորմեա քո արարածոց և ինձ բազմա-  
մեղիս:

Հաւատով խոստովանիմ և երկիրպա-  
գանեմ քեզ՝ անբաժանելի լոյս, միասնա-  
կան սուրբ Երրորդութիւն և մի Աստուա-  
ծութիւն. արարիչ լուսոյ և հալածիչ խա-  
ւարի, հալածեա ի հոգւոյ իմմէ զխաւար

մեղաց և անգիտութեան, և լուսաւորեա  
զմիտս իմ ի ժամուս յայսմիկ աղօթել քեզ  
ի հաճոյս և ընդունել ի քէն զխնդրուածս  
իմ. և ողորմեա :

Հայր երկնաւոր Աստուած ճշմարիտ՝  
որ առաքեցեր զՈրդիդ քո սիրելի ի խնդիր  
մոլորեալ ոչխարին. մեղայ յերկինս և ա-  
ռաջի քո. ընկալ զիս որպէս զանառակ որ-  
դին և զգեցո ինձ զպատմուճանն զառա-  
ջին զոր մերկացայ մեղօք. և ողորմեա :

Որդի Աստուծոյ Աստուած ճշմարիտ՝  
որ խոնարհեցար ի հայրական ծոցոյ և առեր  
մարմին ի սրբոյ կուսէն Մարիամայ վասն  
մերոյ փրկութեան. խաչեցար, թաղեցար  
և յարեար ի մեռելոց՝ և համբարձար փա-  
ռօք առ Հայր. մեղայ յերկինս և առաջի  
քո. յիշեա զիս որպէս զաւազակն յորժամ  
զաս արքայութեամբ քով. և ողորմեա :

Հոգի Աստուծոյ Աստուած ճշմարիտ՝  
որ իջեր ի Յորդանան և ի վերնատունն եւ  
լուսաւորեցեր զիս մկրտութեամբ սուրբ  
աւազանին, մեղայ յերկինս և առաջի քո.  
մաքրեա զիս վերստին Աստուածային հրով  
քով՝ որպէս հրեղէն լեզուօք սուրբ զԱռաք-

եալսն, և ողորմեա քո արարածոց և ինձ  
բազմամեղիս :

Անեղ բնութիւն՝ մեղայ քեզ մտօք  
իմովք, հոգևով և մարմնով իմով. մի՛ յի-  
շեր զմեղս իմ զառաջինս վասն անուանդ  
քում սրբոյ. և ողորմեա :

Տեսող ամենայնի, մեղայ քեզ խոր-  
հըրդով, բանիւ և գործով. ջնջեա զձեռա-  
գիր յանցանաց իմոց, և գրեա զանուն իմ  
ի դպրութեան կենաց. և ողորմեա :

Քննող գաղտնեաց, մեղայ քեզ կա-  
մայ և ակամայ, գիտութեամբ և անգի-  
տութեամբ. թողութիւն շնորհեա մեղաւո-  
րիս, զի ի ծննդենէ սուրբ աւագանին մինչև  
ցայսօր մեղուցեալ եմ առաջի Աստուա-  
ծութեանդ քո զգայարանօք իմովք և ա-  
մենայն անդամօք մարմնոյս. և ողոր :

Ամենախնամ Տէր, դիր պահապան ա-  
չաց իմոց զերկիւղ քո սուրբ՝ ոչ ևս հա-  
յիլ յայրատ, և ականջաց իմոց ոչ ախոր-  
ժել լսել զբանս չարութեան, և բերանոյ  
իմոյ ոչ խօսիլ զստութիւն, և սրտի իմոյ  
ոչ խորհել զչարութիւն, և ձեռաց իմոց  
ոչ գործել զանիրաւութիւն, և ոտից իմոց

ոչ գնալ ի ճանապարհս անօրէնութեան .  
այլ ուղղեա զչարժումն սոցա լինիլ միշտ  
ըստ պատուիրանաց քոց յամենայնի . և  
ողորմեա :

Հուր կենդանի Քրիստոս , զհուր սիրոյ  
քո զոր արկեր յերկիր , բորբոքեա յանձն  
իմ . զի այրեսցէ զախտ հոգւոյ իմոյ , եւ  
սրբեսցէ զխիղճ մտաց իմոց , և մաքրեսցէ  
զմեղս մարմնոյ իմոյ , և վառեսցէ զլոյս  
գիտութեան քո ի սրտի իմում . և ողոր :

Իմաստութիւն Հօր Յիսուս , տուր ինձ  
իմաստութիւն զբարիս խորհել և խօսել և  
գործել առաջի քո յամենայն ժամ . ի չար  
խորհրդոց՝ ի բանից և ի գործոց փրկեա  
զիս . և ողորմեա :

Կամեցող բարեաց Տէր կամարար , մի՛  
թողուր զիս ի կամս անձին իմոյ գնալ , այլ  
առաջնորդեա ինձ լինել միշտ ըստ կամաց  
քոց բարեսիրաց . և ողորմեա :

Արքայ երկնաւոր , տուր ինձ զարքա-  
յութիւն քո զոր խոստացար սիրելեաց քոց .  
եւ զօրացո զսիրտ իմ ատել զմեղս , և սի-  
րել զքեզ միայն , և առնել զկամս քո .  
և ողորմեա :

Խնամող արարածոց, պահեա նշանաւ  
Խաչի քո զհոգի և զմարմին իմ ի պատ-  
րանաց մեղաց, ի փորձութեանց դիւաց, և  
ի մարդոց անիրաւաց, և յամենայն վտան-  
գից հոգւոյ և մարմնոյ. և ողորմեա :

Պահապան ամենայնի Քրիստոս, աջ քո  
հովանի լիցի ի վերայ իմ ի տուէ և ի գի-  
շերի, ի նստիլ ի տան, ի գնալ ի ճանա-  
պարհ, ի ննջել և ի յառնել, զի մի երբեք  
սասանեցայց. և ողորմեա :

Աստուած իմ, որ բանաս զձեռն քո և  
լնուս զամենայն արարածս ողորմութեամբ  
քով. քեզ յանձն առնեմ զանձն իմ. դու  
հոգա և պատրաստեա զպէտս հոգւոյ եւ  
մարմնոյ իմոյ յայսմհետէ մինչև յաւիտ-  
եան. և ողորմեա :

Դարձուցիչ մոլորելոց, դարձո զիս ի  
չար սովորութեանց իմոց ի բարի սովորու-  
թիւն, և բեռեա ի հոգի իմ զսոսկալի օր  
մահուն և զերկիւղ գեհենոյն և զսէր ար-  
քայութեանն. զի զղջացայց ի մեղաց եւ  
գործեցից զարդարութիւն. և ողորմեա :

Աղբիւր անմահութեան, աղբերացո ի  
սրտէ իմմէ զարտասուս ապաշխարութեան

որպէս պոռնկին՝ զի լուացից զմեղս անձին  
իմոյ յառաջ քան զելանելն իմ յաշխար-  
հէս . և ողորմեա :

Պարգեիչ ողորմութեան , պարգևեա՛  
ինձ ուղղափառ հաւատով և բարի գոր-  
ծով , և սուրբ մարմնոյ և արեան քո հա-  
ղորդութեամբ գալ առ քեզ . և ողոր :

Բարերար Տէր , հրեշտակի բարւոյ յանձն  
արասցես զիս , քաղցրութեամբ աւանդել  
զհոգի իմ , և անխռով անցուցանել ընդ  
չարութիւն այսոցն՝ որք են ի ներքոյ երկ-  
նից . և ողորմեա :

Հոյս ճշմարիտ Քրիստոս , արժանա-  
ւորեա զհոգի իմ ուրախութեամբ տեսա-  
նել զլոյս փառաց քոց ի կոչման աւուրն .  
և հանգչիլ յուսով բարեաց յօթեանս ար-  
դարոց մինչև յօր մեծի գալստեան քո .  
և ողորմեա :

Դատաւոր արդար , յորժամ գաս փա-  
ռօք Հօր՝ դատել զկենդանիս և զմեռ-  
եալս , մի՛ մտաներ ի դատաստան ընդ ծա-  
ռայի քում . այլ փրկեա զիս ի յաւիտենա-  
կան հրոյն , և լսելի արա ինձ զերանաւէտ

կոչումն արդարոց յերկնից արքայութիւնդ .  
և ողորմեա :

Ամենողորմ Տէր , ողորմեա ամենայն  
հաւատացելոց ի քեզ , իմոց եւ օտարաց ,  
ծանօթից եւ անծանօթից , կենդանեաց եւ  
մեռելոց . շնորհեա եւ թշնամեաց իմոց եւ  
ատելեաց զթողութիւն որ առիս յանցա-  
նացն , եւ դարձո զնոսա ի չարեացն զոր  
ունին վասն իմ , զի ողորմութեանդ քում  
արժանի եղիցին . եւ ողորմեա :

Փառաւորեալ Տէր , ընկալ զաղաչանս  
ծառայիս քո , եւ կատարեա՛ ի բարի ըզ-  
խնդրուածս իմ՝ բարեխօսութեամբ սրբուհ-  
ւոյ Աստուածածնին , եւ Յովհաննու Մը-  
կրտչին , եւ սրբոյն Ստեփանոսի նախա-  
վկային եւ սրբոյն Գրիգորի մերոյ Կուսա-  
ւորչին . եւ սրբոց Առաքելոց , Մարգարէից ,  
Վարդապետաց , Մարտիրոսաց , Հայրապե-  
տաց , Ճգնաւորաց , Կուսանաց , Միանձանց ,  
եւ ամենայն Սրբոց քոց երկնաւորաց եւ  
երկրաւորաց : Եւ քեզ փառք եւ երկրպա-  
գութիւն անբաժանելի սուրբ Երրորդու-  
թեանդ՝ յաւիտեանս յաւիտենից . Ամէն :

## Մ Ա Ղ Թ Ա Ն Ք

Վասն սրբուհւոյ Աստուածածնի բարեխօսութեանն, Տէր, ընկալ զաղաչանս մեր, եւ կեցո զմեզ:

## Ք Ա Ր Ո Ջ

Սուրբ զԱստուածածինն եւ զամենայն սուրբս բարեխօս արասցուք առ Հայր ի յերկինս, զի կամեցեալ ողորմեսցի՝ եւ գըթացեալ կեցուսցէ զարարածս իւր: Ամենակալ Տէր Աստուած մեր կեցո եւ ողորմեա:

## Ա Ղ Օ Թ Ք

Ընկալ, Տէր, զաղաչանս մեր՝ բարեխօսութեամբ սուրբ Աստուածածնին անարատ ծնողի միածնի Որդւոյ քոյ, եւ աղաչանօք ամենայն սրբոց քոց, եւ որոց այսօր է յիշատակ: Լուր մեզ, Տէր, եւ ողորմեա, ներեա, քաւեա, եւ թող զմեզս մեր: Արժանաւորեա գոհութեամբ փառաւորել զքեզ ընդ Որդւոյ եւ ընդ Սրբոյ Հոգւոյդ. այժմ եւ միշտ եւ յաւիտեանս յաւիտենից. Ամէն:

Օրհնեալ Տէր մեր Յիսուս Քրիստոս. Ամէն:

Հա՛յր մեր, որ յերկինս:



## Մ Ա Ղ Թ Ա Ն Ք

Զհանգստեան զաղօթս եւ զաղաչանս՝  
ընկալ մարդասէր Աստուած, ի հաճոյս բա-  
րերար կամաց քոց: Մեր մեղաց եւ բա-  
զում յանցանացն թողութիւն շնորհեա, եւ  
քեզ փառք յաւիտեանս. Ամէն:

Փառք քեզ, Տէր Աստուած մեր, որ  
պարգեւեցեր զօրս զայս բարեաւ եւ խա-  
ղաղութեամբ անցուցանել:

Մարդասէր Աստուած, զառաջիկայ գի-  
շերս որ ի վերայ մեր գալոց է՝ ի մեղաց  
փրկեա, ի չարեաց ազատեա, եւ ի գործս  
բարիս առաջնորդեա:

Առաւօտու օրհնութեանցն եւ փառա-  
բանութեանցն արժանի արա զամենայն  
հաւատացեալս անուանդ քում սրբոյ, եւ  
պահեա ի խաղաղութեան:

Տէր Աստուած մեր՝ տուր զքո խաղա-  
ղութիւնդ ամենայն աշխարհի, բարձ զցա-  
սումն եւ զպատուհասն ի յարարածոց:

Ողորմեա հարց եւ եղբարց մերոց կեն-  
դանեաց եւ հանգուցելոց:


Ողորմեա զեկեղեցի շինողաց, երախ-

տաւորաց , պտղատուից , սպասաւորաց , եւ  
այնոցիկ՝ որք ընդ հովանեաւ սրբոյ եկե-  
ղեցւոյ են հանգուցեալ :

Տէր Աստուած՝ օգնեա թագաւորացն  
քրիստոնէից , եւ իշխանացն բարեպաշտից .  
զօրաց եւ զաւակաց նոցին՝ պահելով ի  
խաղաղութեան :

Տէր Աստուած մեր՝ պահեա զառաջ-  
նորդս եւ զեղբայրութիւնս մեր ամբողջ եւ  
անխռով ի կամս ողորմութեան քոյ :

Նշանաւ սուրբ եւ պատուական Սաչիւ  
քոյ՝ հալածեա զերեւելի եւ զաներեւոյթ  
թշնամին ի սահմանաց մերոց եւ ի բնակու-  
թենէս մերմէ : Փրկեա զմեզ ի հրոյն յաւի-  
տենից , եւ քեզ փառք յաւիտեանս . Ամէն :




## Պ Ա Ղ Ա Տ Ա Ն Ք Ա Ռ Հ Ո Գ Ի Ն Ս Ո Ւ Ր Բ

Ազաչեմ զանփոփոխելի տէրութիւն  
ամենազօր Հոգւոյդ հզօրի. առաքեա՛ զցօղ  
քաղցրութեան քոյ, եւ բարեգործեա՛ ի  
յանձին եւ յիշխանական ազդման զգայու-  
թեան՝ զամենալից շնորհս բազմապարգե-  
քո ողորմութեանդ: Եւ հերկեա՛ զբանական  
անդաստան մարմնեղէն կարծրացեալ սրտիս,  
յընդունակութիւն արգասեաց հոգեւոր սեր-  
մանդ: Քու՛մ ամենիմաստ էութեանդ խոս-  
տովանիմք զամենայն պարգեւս ի մեզ  
ծաղկեալ եւ աճեցեալ. որ ձեռնադրես Ա-  
ռաքեալս, լցուցանես Մարգարէս, ուսու-  
ցանես վարդապետս, բարբառեցուցանես  
համերս, և բանաս զփակեալ ականջս խլից.  
որպէս ազգակիցն քո՝ էակիցն Հօր՝ անդ-  
րանիկն Որդի՝ քոյին գործակցութեամբդ  
ներգործելով զայս ամենայն քարոզեաց  
զքեզ Աստուած հաւասարակից իսկու-  
թեանդ Հօր: Շնորհեա՛ և ինձ մեղաւորիս  
խօսել համարձակութեամբ զկենդանարար  
խորհուրդ աւետեաց Աւետարանիդ. հետե-

ւել արագաթռիչ ընթացիւք մտաց՝ ընդ  
 անհուն ասպարէզս քոյինս շունչ կտակա-  
 րանաց։ Եւ ի մատչիլ իմ ի գլուխ հանդիսի  
 մեկնութեան բանի, նա՛խ ժամանեցէ առ  
 իս գթութիւն քո. խօսելով յիս զարժանն  
 և զպիտանիսն և զհաճոյսն քո ի ժամա-  
 նակի. ի փառս և ի գովեստ Աստուածու-  
 թեանդ քո. ի լրումն շինութեան կաթու-  
 ղիկէ Եկեղեցւոյ։ Եւ կարկառեա՛ ի վերայ  
 իմ զամենամերձ աջ քո. և զօրացո՛ զիս  
 շնորհօք գթութեանդ քո. փարատեա՛ ի  
 մտաց իմոց զմէզ մթութեան մոռացու-  
 թեան. ապաքինեալ ընդ նմին զխաւար  
 մեղաց. ամբառնալ ուշիւ իմաստիցս ի  
 կենցաղոյս երկրէ ի բարձունս։ Կուսաւոր-  
 եա՛ յիս վերստին զծագումն անստուեր  
 հրաշից գիտութեան Աստուածութեանդ քո  
 հզօր. արժանի լինիլ առնել և ուսուցանել  
 յօրինակ բարեաց Աստուածասէր լսողաց։  
 Եւ քեզ ամենայն փառք յամենայնի, ընդ  
 Հօր ամենակալի և ընդ Որդւոյն միածնի  
 և բարերարի. այժմ և յանվախճան յաւիտ-  
 եանս. Ամէն։

---



Աղբիւր կենաց բաշխող շնորհաց  
Հոգիդ իջեալ ի բարձանց,  
Զանապական պարգեւս քո  
Բաժանեցեր յառաքեալս :

## ԱՂՕԹՔ

## ՎԱՍՆ ՆՆՋԵՑԵԼՈՑ

Աղաչեմ և խնդրեմ ի քէն ո՛վ բազմագուլթ Աստուած՝ վասն ազգիս մերոյ հնոց և նորոց և համօրէն հաւատով և յուսով ի քեզ ննջեցելոցն: Եւ մանաւանդ՝ վասն իմոց մարմնաւոր և հոգևոր ծնողաց, եղբարց, քերց, ազգականաց, սիրելեաց, ի բարիս կրթողաց և ուսուցչաց, և բարեկամաց, և հոգևոր վարդապետաց և ամենայն աշխատաւորաց եւ երախտաւորաց մերոց ի քեզ ննջեցելոց: Զորս յիշեսցես յողորմութիւնս քո յաւուր մեծի գալստեան քո. թողութիւն շնորհեսցես ամենայն մեղաց եւ սխալանաց նոցին. եւ դասեսցես ընդ սուրբս քո յաջակողման դասուն. եւ տացես լսել զերանաւէտ բարբառն քո թէ՛ եկա՛յք օրհնեալք Հօր իմոյ. և ըստ երախտեաց նոցին որ առ մեզ՝ միոյն բիւրապատիկս հատուցես ի հոգիս նոցա. և զմեզ անդատապարտ արասցես ի նոցին պարտուցն. և քեզ փառք յաւիտեանս յաւիտենից. Ամէն:

## ԱՂՕԹՔ ՏԷՐՈՒՆԱԿԱՆ

Որպէս պատուիրէ Փրկիչն մեր .

«Յորժամ կայցէք յաղօթս,  
մի՛ շատախօսք լինիք» :  
(ՄԱՏԹ. Զ. 7)

Հա՛յր մեր, որ յերկինս ես, սուրբ ե-  
ղիցի անուն քո : Եկեսցէ արքայութիւն քո .  
եղիցին կամք քո որպէս յերկինս և յերկրի :  
Զհաց մեր հանապազորդ տո՛ւր մեզ այսօր :  
Եւ թող մեզ զպարտիս մեր, որպէս և մեք  
թողումք մերոց պարտապանաց : Եւ մի՛  
տանիր զմեզ ի փորձութիւն . այլ փրկեա՛  
զմեզ ի չարէ : Զի քո է արքայութիւն, և  
զօրութիւն, և փառք յաւիտեանս . Ամէն :

